

ಕೈಮುಡ



ಎಳ್‌ದ್‌ನವು

ಶ್ರೀ ಚಿರಿಯಪಂಡ ರಾಜಾ ನಂಜಪ್ಪ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

ಕೈಮಡ

ಎಳೆದೊನವು

ಶ್ರೀ ಚಿರಿಯಪಂಡ ರಾಜಾ ನಂಜಪ್ಪ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

"Kaimada"

Written by Sri. Chiriyapanda Raja Nanjappa, Madikeri,
Kodagu. Published by The Karnataka Kodava Sahithya
Academy, Madikeri

ಮುದ್ರಣ : 2011

ಪ್ರತಿ : 500

© ಎಲ್ಲಾ ಹಕ್ಕುಗಳ ಕಾಪಿ ಬೆಚ್ಚಿತ್.

ಪ್ರಕಟ ಪಡಾತನವು :

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಕ್ರಯ : 50 ಉರೂಪಿಯ

ಪುಸ್ತಕ ಕೊಟ್ಟವ ಜಾಗ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚುಕಾರ :

ಶ್ರೀ ಕೃಷ್ಣ ಕಂಪ್ಯೂಟರ್ಸ್ ಅಂಡ್ ಪ್ರಿಂಟರ್ಸ್

ಪೂಜಾ ಆರ್ಕೆಡ್,

ಜೂನಿಯರ್ ಕಾಲೇಜ್ ರೋಡ್, ಮಡಿಕೇರಿ

ಫೋನ್ : 08272 - 224919, 94481 35592

ಎಳ್ತಕಾರಂಡ ತಕ್ಕ

ಕೊಡವಾಮೆ ಕೊಡಗಲ್ ಎಚ್ಚಕ್ಕ ಕಾಲಕ್ ಬಯ್ಯ ಶುರು ಆಚಿ? ಎಲ್ಲಾ ಕೊಡವ ವಂಶತರ ಕುಂಡ್ ಕೊಡಗಂದ್ ಎಣ್ಣಿಯಂಡೂ, ಕೊಡವ ಪೊರ ದೇಶತಂಜಿ ಬಂದಿಯೇಂದ್ ಚೆನ್ನಂಗ್ ಎಳ್ತಕಾರ ಅಯಿಂಗಡ ಎಳ್ತಲ್ ಎಳಿದಿತ್. ಆಚೇಂಗಿ ಏದೂ ನಿರ್ದಿಷ್ಟ ಆಯಿತ್, ಆಧಾರವೂ ಸರಿ ಆಯಿತ್ ಕಂಡ್ ಬಂದಂಡ್ ಇಲ್ಲೆ. ಕ್ರಿ.ಶ. 900ನೇ ಇಸವಿಂಜಿ ಇಪ್ಪರಕ್ ಚೆನ್ನ ಚೆನ್ನ ಆಧಾರ ಕಂಡ್ ಬಂದಂಡ್ ಉಂಡ್.

ಇಂಞಿ ಚೆನ್ನ ಎಳ್ತಕಾರ ಕುರ್ದಿಷ್ಟಾನ್ ಮದ್ಯ ಏಷ್ಯಾತಂಜಿ ಬಂದಿಯೇ ಎಣ್ಣಿಯಂಡ್ ಎಳಿದಿತ್ ಉಂಡ್.

ಕೊಡವ ಒರ್ ಸಮಯ ಬೇಬಿಲೋನಿಯತರ ಆಸ್ಪಾಸ್‌ಲ್ ಪುಟ್ಟಿತಿಕ್ಕು. ಬೇಬಿಲೋನಿಯತರ ಪೂತೋಟ (Hanging Garden) ಪ್ರಪಂಚತಲೇ ಕೇಳಿಪೋನದ್. ಮದ್ಯತ್ರ ಬೇಬಿಲೋನಿಯ ಆಸ್ಪಾಸ್‌ಲ್ ಇಸ್ಲಾಮೀಕರಣ ಆಪಕ್ ಕೊಡವ ಇದಂಗ್ ಒಕ್ಕತೆ ಎನ್ನಂಗ್ ಈಬರಿಕ್ ಬಂದಿತ್ ಇಪ್ಪಕಾಗ? ಉದಾ: ಕೊಡವಡ ಎಲ್ಲಾ ಪದ್ಧತಿಲ್ ಕೋಳಿ ನೆರಿಪ, ಪಂದಿ ಕೆತ್ತವ. ಇದ್ ಇಸ್ಲಾಂಕ್ ವಿರುದ್ಧ. ಆ ಪದ್ಧತಿನ ಒಕ್ಕತೆ ಕೊಡವ ಈ ಬರಿಕ್ ಬಂದಿತ್ತಿಕ್ಕು.

ಕೊಡವ ಪದ್ಧತಿಲ್ ಗೋಮೂತ್ರ, ಚೂಣ, ಪಾಲ್‌ನ ಎಲ್ಲಾ ನಲ್ಲಾಂಗ್, ಕೆಚ್ಚಾಂಗ್ಲಿ ಕೂಟಾವದ್ ಸಾಮಾನ್ಯವಾಯಿತ್ ಕಂಡ್ ಬಪ್ಪ. ಗೋಹತ್ಯೆ ಕೊಡಗಲ್ ಇಲ್ಲೆ. ಆಚೇಂಗಿ ಪ್ರಪಂಚತರ ಎಲ್ಲಾ ಜಾಗತ್ ಕಂಡ್ ಬಪ್ಪ. ಕೊಡವಡ ಮನೆ ಚಿರಿಯದ್ ಆಚೇಂಗಿಯೂ ಪೂತೋಟ ಕಂಡ್ ಬಪ್ಪ. ಇದನ್ ಕಾಂಬಕ ಇನ್ನೆನೆಯೂ ಆಯಿತ್ ಇಪ್ಪಕ್ ಮದಿ.

ಕಾವೇರಿ ಮಹಿಮೆ ಪಿಂಞ ಸ್ಕಂದ ಪುರಾಣ

ಇದತ್ ಕಾವೇರಮ್ಮ ತೀರ್ಥ ಪರಿಯುವಕಾಪಕ ಕೊಡವ ಇಂಜತೇಂದ್ ಪುರಾಣತ್ ಕಂಡ್ ಬಪ್ಪ. ಆಚೇಂಗಿಯೂ ಬಯ್ಯತರ ಚರಿತ್ರೆ ಪೋಲೆ ಇದೆಲ್ಲಾ ನೋಟುವಕ ಕೊಡವ, ಕೊಡಗರ್ ಜನಾಂಗ, ಕೊಡವಂಗಳೆಂದೇ ಕೊಡಗ್ ಪೆದ ಬಂದಿಯೆ. ಕೊಡವಾಮೆ ಶುರು ಆಪಕ ಗುರು, ಕಾರಣ ಇಂಜತ್.

ನಾಕ್ ಈ ಪುಸ್ತಕ ಎಳುದುವಕ ನಾಡ ಜೊತೆಲ್ ಇಂಜಿತ್ ಸಹಕಾರ ಮಾಡ್‌ನ ನಾಡ ಅಣ್ಣಿ ಚಿರಿಯಪಂಡ ಎಂ. ಪ್ರಸಾದ್ ಬೆಳ್ಳಿಯಪಂಗ್ ನಾಡ ಕೃತಜ್ಞತೆ.

ಚಿರಿಯಪಂಡ ರಾಜಾ ನಂಜಪ್ಪ

ಅಧ್ಯಕ್ಷಿಣಿರ ತಕ್ಕ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಗುರಿ ಉದ್ದೇಶ ಕೊಡವಾಮೆನ ಉಳ್ತೆ ಬೊಳ್ತೆ ಕಾಪಾಡುವದ್. ಕೊಡವಾಮೆ ಬೊಳಿಯಂಡಿಕ್ ಕೊಡವ ಸಾಹಿತ್ಯ, ಭಾಷೆ, ಸಂಸ್ಕೃತಿ, ಕಲೆ ಪಿಂಞ ಜಾನಪದ ಕಲೆ ಉಳಿಯಂಡು. ಕೊಡವಾಮೆಕ್ ಸಂಬಂಧಪಟ್ಟ ಎಳ್ತನೆಲ್ಲ ಪುಸ್ತಕ ರೂಪತ್ಲಾ ಬೊಳಿ ಪಡತುವದ್ ನಂಗಡ ಕರ್ತವ್ಯ. ಪುಸ್ತಕ ಎಳ್ತದುವವು ಎಲ್ಲಾ ಕೇಳಿಪಟ್ಟ ಸಾಹಿತ್ಯ ಅಯಿತಿಪ್ಪಾಲೆ. ಸಂಸ್ಕೃತಿಕ್ ಸಂಬಂಧಪಟ್ಟ ಪುಸ್ತಕ ಒಪ್ಪಕ ಅದ್ಂಡ ಸಾಹಿತ್ಯಕ ಮೌಲ್ಯಕ್ ಬೆಲೆ ಕೆಟ್ವಾವಾಂಗ್ಂಜಿ ಅದ್ಲಾ ಅಡಂಗಿತ್ತುಳ್ಳ ಸಾಂಸ್ಕೃತಿಕ ಮೌಲ್ಯಕ್ ಬೆಲೆ ಕೆಟ್ಟಂಡು.

'ಕೈಮಡ'ಕ್ ಕೊಡವ ಭಾಷಿಕ ಸಮುದಾಯತ್ಲಾ ಪವಿತ್ರ ಸ್ಥಾನ ಮಾನವುಂಡ್. ಪದ್ಧತಿಲ್ ಊರ್ಂಜಿ ಊರ್ಕ್ ಚೆರಿಯ ಚೆರಿಯ ವ್ಯತ್ಯಾಸ ಇಪ್ಪ.

ಶ್ರೀ ಚೆರಿಯಪ್ಪಂಡ ರಾಜಾನಂಜಪ್ಪ ತಂಗಡ ಊರ್ ನಾಡ್ಲೂ ಪಿಂಞ ಅಯಿಂಗ ನೋಟಿತೂ ಕೇಟಿತೂ ಅರ್ಂಜ ಕೈಮಡ ಕೊಡಪ ಪದ್ಧತಿನ ಈ ಚೆರಿಯ ಪುಸ್ತಕತ್ಲಾ ವಿವರಣೆ ತಂದಿತ್. ಕೊಡವಾಮೆಕ್ ಇದ್ ಅಯಿಂಡ ಕೊಡುಗೆ ಮಾಜನ ಈ ಪುಸ್ತಕ ಎಡ್ತ್ ಓದಿತ್ ತಂಗಡ ಅರಿವುನ ಜಾಸ್ತಿ ಮಾಡಿಯವಂಡಿಯದ್ ಅವಶ್ಯ.

ಬಮುಡಿಯಂಡ ರಾಣಿ ಮಾಚಯ್ಯ

ಅಧ್ಯಕ್ಷೆ

ಕಾರಣ :

ಕೊಡವದ 22 ಉಪ ಜನಾಂಗತ್ ಎಲ್ಲಾ 22 ಜನಾಂಗಕ್ಕೂ ಒಕ್ಕ ಪೆದ (ಮನೆಪೆದ) ಉಂಡ್. ಎಲ್ಲಾ ಒಕ್ಕಕ್ಕೂ ಆದ್ಯ ವ್ಯಕ್ತಿಯೇ ಕಾರಣ. ಒಕ್ಕಡ ಕಾರಣಕರ್ತ ಆನವನೇ 'ಕಾರಣ'ಂದೂ ಎಣ್ಣೊವ.

* * * * *


ಗುರು :

ಕಾರಣಂಗ್ ವಿದ್ಯ, ಪಡಿಪು, ಪಡಿಪ್ಪಾಚಿಟ್ಟವನೇ ಗುರು.

* * * * *

ಕೈಮಡ

ಒಕ್ಕಡ ಆದ್ಯ ಪುರುಷನ ಅಳಾಪ್ಪಾಚಿಟ್ಟಿತ್ ಪೂಪಂಜಿ, ಆಂಡ ಮೇಲೆ



ಕೈಮಡ

ಚಚ್ಚೌಕ ಆಯಿತ್ 2-3 ಅಡಿ ಎತ್ತರಕೆತ್ತನೆಕ್ ಒಳ್ಳಲ್ ಬೊಳ್ಳಚಕ್ ಪಿಂಞ ಮೀದಿ ಬೆಪ್ಪಕ್ ಪಿಂಞ ಇಂಞೋರ್ ಚೆರಿಯ ಕಲ್ಲ್ ಬೊಳ್ಳಚಕ್ ಒರ್ ಚೆರಿಯ ಕೋಂಬರೆ ಮಾಡಿತಿಪ್ಪ. ಇದ್‌ಂಗ್ ಬೂಡ್‌ಂದ್ ಎಣ್ಣವ. ಇದ್‌ಂಡ ಮೇಲೆ 4 ಮೂಲೆ ಪೊರೆ ಆಯಿತ್ ಕೈಮಡ ಕೆಟ್ಟುವ.

- (ಅ) ಇಂಞಿ ಚನ್ನ ಜಾಗತ್ 2 ಅಡಿ ಎತ್ತರತರ ಚಚ್ಚೌಕ ಆಯಿತ್ 10x10 ಅಡಿ ಉದ್ದ ಅಗಲತ್ ಕಲ್ಲರ ಕಕ್ಕಟ್ಟ್ ಇಪ್ಪ. ಅದ್‌ಂಡ ಒಳ್ಳಲ್ 'ಬೂಡ್' ಇಪ್ಪ.
- (ಆ) ಪಾಮರತರ ಅಡಿಲ್ ಒರ್ ಕಲ್ಲ್ ಇಪ್ಪ. ಅದ್ ಪೂತ ಜಾಗತ್ ಗುರ್‌ತ್‌ಕ್ ಬೆಚ್ಚಿತ್ತಿಪ್ಪ.
- (ಇ) ಇಂಞಿ ಚನ್ನ ಜಾಗತ್ ಕಾಂಕ್ರಿಟ್‌ರ ಪೌಂಡೇಷನ್ ಆಯಿತ್ ಸುತ್ತಾ ಗೋಡೆ, ಆರ್.ಸಿ.ಸಿ. ಆಯಿತ್ ಬೂಡತರ ಮಿಂಞ ಬರಿಕ್ ಗ್ರೀಲ್ಸ್ ಕಿಡಿ ಕೆ ಪಡಿ ಇಪ್ಪ.
- (ಈ) ಓರಂದ್ ಜಾಗತ್ ಮಣ್ಣರ ತೆರೆ ಮಾಡಿತ್, ಮಿಂಞ ಬರಿಲ್ ಕನ್ನಿಕಂಬ ಆಯಿತ್, ಬಯ್ಯ ಬರಿಕ್ ಪೂರ್ತಿ ಗೋಡೆ ಆಯಿತ್, ಎಡತೆ ಬರಿ, ಬಲತೆ ಬರಿಕ್ ಪಾದಿ ತೊರಂದಿತ್ ಪೂರ್ತಿ ಗೋಡೆ ಕೆಟ್ಟಿತ್ತಿಪ್ಪ.
- (ಉ) ವಿಶೇಷ ಆಯಿತ್ ಅಜ್ಜಿ ಕುಟ್ಟಿರ ಅಚ್ಚುನಾಯಕಂಡ ಕಲ್ಲ್ ಕೈಮಡ. ಅವಂಡ ಮಾಂವಂಡ ಕೈಮಡತ್ ಸುಮಾರ್ 400 ಕಾಲತರ ತೇಗಮರ ಕಂಡ್‌ಬಪ್ಪ.
- (ಊ) ಚೆನ್ನಂಗ್ ಜಾಗತ್ ಕಾರಣನೂ, ಕಾರಣಚ್ಚಿಯೂ ಒರೇ ಕೈಮಡತರ ಒಳ್ಳಲ್ ಇಪ್ಪ.
- (ಋ) ಓರಂದ್ ಜಾಗತ್ ಕೈಮಡತರ ಒಳ್ಳಲ್ ಕಾರಣಂಗೂ ಕಾರಣಚ್ಚಿಕ್ಕೂ

ಪ್ರತ್ಯೇಕ ಕೋಂಬರೆ, ಪ್ರತ್ಯೇಕ ಎಡೆ (ಉದಾ: ಮೂಕಳೇರ ಮನೆ.)

ಇಷ್ಟು

ಕೈಮಡತರ ಸ್ಥಾನ ಸಾಮಾನ್ಯವಾಯಿತ್ ಬೇಲ್ ಕರಲ್, ತೋಡ್, ಪೊಳೆಕರಲ್ ಕಂಡ್ ಬಪ್ಪ. ಚೆನ್ನ ಜಾಗತ್ ಕೇಕೊಳತರ ಚೆನ್ನ ಪಕ್ಕತ್ ಕಂಡ್ ಬಪ್ಪ. ಚೆನ್ನ ಜಾಗತ್ ಬೇಲ್ ಕರಲ್ ಕಳಕ್ ಕ ಭೂಮಿಕ್ (ಬೇಲ್) ಕಮಾಡ್ ಆಯಿತ್ ಉಂಡ್. ಕೊಣಿಯಂಡ್ ಬಾಳಾಜಿ ಗ್ರಾಮ. ಅದೇ ಊರಲ್ ಬೇಲ್ (ಭೂಮಿ) ಕರಲ್ ಕೇಕ್ ದಿಕ್ಕ್ ಮೂಡ್ ಆಯಿತ್ ಉಂಡ್. (ಕಾಳಪಂಡ)

(ಎ) ದಂಡ್ ಕೈಮಡ : ಚಿರಿಯಪ್ಪಂಡ ಒಕ್ಕಡಲ್ಲಿ ದಂಡ್ ಕೈಮಡ ಉಂಡ್ ಒಂದ್ ಕಿರ್ಗೂರ್ ಪಿಂಞ ಕಾನೂರು. ಇಯಂಗಡ ಸಂಬಂಧ ಒಂದೆ.

ಮೂಂದ್ ಕೈಮಡ : ಮಾಚಂಗಡ ಒಕ್ಕತ್ ಮೂಂದ್ ಕೈಮಡ. ಆದ್ಯ ಕಾರಣಂಡ ಕೈಮಡ ಪೊಳೆ ಕರಲ್, ದಂಡನೆ ಪಿಂಞ ಮೂಂದನೆ ಕೈಮಡ ಬೇಲ್ಕರಲ್ ಬಾಣೆಕ್ ಮೂಡ್ ಆಯಿತ್ ಉಂಡ್. ದಂಡನೆ ಕೈಮಡತಲ್ 4 ಬೂಡ್, ಒರ್ ಚೆರಿಯ ಬೂಡ್ ಉಂಡ್. ಮೂಂದನೆ ಕೈಮಡತ್ ಕಾರಣ ಪಿಂಞ ಕಾರಣಚ್ಚಿರ ಬೂಡ್ ಉಂಡ್.

ಮೂಂದ್ ಕೈಮಡತ್ ಒರ್ ಕಾರಣಚ್ಚಿರ ಕೈಮಡ ಒಕ್ಕತ್. ದಂಡ್ ಕುತ್ತಿಲ್. ಕಾರಣಂಗ ದಂಡ್. ಒರ್ ಕುತ್ತಿಕಾರ ದಂಡ್ ಕಾರಣಂಗ್ ಕೊಡ್ಪ. ಅದೇ ಒಕ್ಕತರ ಇಂಞೋರ್ ಕುತ್ತಿಕಾರ ಕಾರಣಚ್ಚಿಕ್ ಕೊಡ್ತಿತ್ ಕಾರಣಂಗ್ ಕೊಡ್ಪ. (ವಾಚಿವಾಡ, (ಬಲ್ಯಮಂಡೂರ್) ನಲ್ಲೂರ್ ಪುಚ್ಚಿಮಾಡ ಒಕ್ಕಕಾರ ಕಾರಣಚ್ಚಿಕ್ ಕೊಡ್ತಿತ್ ಕಾರಣಂಗ್ ಕೊಡ್ಪ)

ಕಾರಣಂಗ್ ಕೊಡ್ಪ ಸಮಯ

ಮೇಂದಲೆ ನಾಡ್‌ಲ್ ಚಂಗ್ರಾದಿಂಜಿ ಪತ್ತಲೋದಿಕೆತ್ತನೆಕ್ ಕಾರಣ ಕೊಡ್ಪ. ಕಿಗ್ಗಟ್‌ಲ್ ಸಾಧಾರಣ ಬಿಟ್ಟಂಗಾಲತ್‌ಂಜಿ ಬಾಳೆಲೆ ಕುಟ್ಟಕೆತ್ತನೆ ಬಿಸು (ವಿಶು)ಕ್ಯಾ, ಅದ್ ಕೈಂಜದೂ ಕೊಡ್ಪ.



ಅಜ್ಜಿ ಕುಟ್ಟರ ಅಚ್ಚುನಾಯಕಂಡ ಕೈಮಡ

ಕಾರಣಂಗ್ ಕೊಡ್ಪ ಪದ್ಧತಿ

1. ಐನ್ ಮನರ ಕನ್ನಿ ಕೋಂಬರಲ್ ಕೋಳಿ ನೆರಚಿತ್, ನೆಲ್ಲಕ್ಕಿ ನಡುಬಾಡೆಲ್ ಎಡೆ ಇಟ್ಟಿತ್ ಕ್ಯಾಕೊಳತ್ ಬೆಚ್ಚಿತ್ ಎಡೆ ಮೇಂಗ್‌ವ.
2. ಕನ್ನಿ ಕೋಂಬರಲ್ ಕೋಳಿ ನೆರಚಿತ್ ನೆಲ್ಲಕ್ಕಿ ನಡು ಬಾಡೆಲ್ ಎಡೆ ಇಟ್ಟಿತ್ ಅಲ್ಲಿ ಎಡೆ ಮೇಂಗ್‌ವ.

3. ಐನ್ ಮನೆಂಜಿ ಎಡೆಕುಳ್ಳ ಬಟ್ಟಿ ಸಾಮಾನ ಎಡ್ತ ಪೋಯಿತ್ ಕೈಮಡತ್ ಕೊಡ್ತಿತ್ ಎಡೆ ಮೇಂಗಿತ್ ಬಲ್ಯ ಮನೆಕ್ ಬಂದಿತ್ ಎಡೆ ಇಟ್ಟಿತ್, ಆ ಎಡೆನ ಓರಂದ್ ಕೋಂಬರೆಕ್ ಬೆಚ್ಚಿತ್ ಬಾಕಿ ಎಡೆನ ಕ್ಯಾಕೊಳಕ್ ಪೋಯಿತ್ ಬೆಚ್ಚಿತ್ ಮನೆಕ್ ಬಂದಿತ್ ಉಂಡಿತ್ ಪಿರಿಯುವ.
4. ಬಲ್ಯ ಮನೆಂಜಿ ಬಟ್ಟಿ, ಕೋಳಿ, ಪಂದಿ ಆಯಿತ್ ಕೈಮಡಕ್ ಪೋಯಿತ್ ಕೋಳಿ ಪಂದಿ ಅರ್ತಿತ್ ತಿಂದ್ ಕುಡ್ಡಿತ್ ಪಿರಿಯುವ.
5. ಕಾರಣ, ಕಾರಣಿಚಿರ ಪ್ರತ್ಯೇಕ ಕೊಡ್ಪ ಪಿಂಞ ಕಾರಣಿಚ್ಚಿಕ್ ಮಾತ್ರ ಕೊಡ್ಪ.
6. ಕಾರಣಂಗ್ ಕಾರಣಿಚಿಕ್ ಜೊತೆಲೇ ಅಡಿಗೇ ಮಾಡಿತ್, ಕಾರಣಂಗ್ ಎರಚಿ ಚುಡಂಗರೆ. ಕಾರಣಿಚಿಕ್ ಪುಳಿಚಾರ್ ಪಿಂಞ ಮೊದಾರ.
7. ಪಂದಿ ಕೋಳಿ ಇಲ್ಲತೆ, ಹೆಸರ್ ಪಾಯಸ, ತರಕಾರಿ, ಕೂಳ್ ಕರಿ ಮೊದಾರ, ಬಾಳೆ ನುರುಕ್ ಅಡಿಕೆ ಪುಟ್ತ್ (ಅಚ್ಚು ನಾಯಕ)
8. ಚನ್ನಂಗ್ ಅಮ್ಮ ಕೊಡವ ಮನೆಲ್ ಪಿಂಞ ಕೊಡವಡಲ್ಲಿ. ಬೊರಿ ತರಕಾರಿ ಮೊದಾರ ಬಲ್ಯ ಮನೆಲೇ ಮಾಡಿತ್ ಅಲ್ಲಿಯೇ ಮೀದಿ ಪಿಂಞ ಎಡೆ ಬೆಪ್ಪ.
9. ಧಾರೆ : ಮಾಚಂಗಡ ಕಾರಣಂಡ ಕೈಮಡತ್ ಪಟ್ಟಿ ಬಂದಿತ್ ಹೆಸರ್ ಪಾಯಸ ಮಾಡಿತ್ ಧಾರೆ ಮಾಡುವ.
10. ಚಂಗ್ರಂದಿ ಪುತ್ತರಿಕ್ ಒರ್ದಿನ ಮುಪ್ಪಡೆ ಎಲ್ಲಾ ಮಕ್ಕಡ ಮಂಗಲಕ್ಕೂ ಪಂದಿ ಅರ್ತಿತ್ ಕಾರಣಂಗ್ ಕೊಡ್ಪ ಕಂಚಿತ್ತಂಡಲ್ಲಿ ಮಾನಿಲ್ ಉಳ್ಳವು ಕಾರಣಂಗ್ ಕೊಡ್ಪ.

ಕಾರಣ ಕೊಡುಪಕ್ ಬೋಂಡಿಯಂತದ್

1 ಕುಳಿಕಾರ ಪಿಂಞ ಕುಳಿಕಾರ್ತಿ :

(1) ಪಯ್ಯು ಪಾಲ್ (2) ಚಾಣ, (3) ಪೊಳಿಬಟ್ಟಿ (4) ಕೊಡಿಯಲೆ ಅಡಿಕೆ (5) ಅಕ್ಕಿ (6) ತಳಿತ್ತಕ್ಕಿ ಬೊಳ್ಚಾಚ (7) ಎಣ್ಣೆತಿರಿ (8) ಕೋತಿರಿ (9) ಕುರ್ದಿ (10) ಚಳ್ಳೆ (11) ಬಾಳೆಪಟ್ಟೆ (12) ಕೊಡಿಬಾಳೆ ಎಲೆ (13) ನೆಲ್ಲರ ಪೊರಿ (14) ಒಟ್ಟಿ (15) ಬಾಳೆ ಒಟ್ಟಿ (16) ಕಳ್ಳ (17) ತೆಂಗೆ (18) ಬಾಳೆ ನುರ್ಕ್ (19) ಕತ್ತಿ (20) ಗಿಂಡಿ (21) ಕಚ್ಚಿ ಚೊಂಬು (22) ಚುಡಂಗರೆ ಕಡ್ಡಿ (23) ಕೋಳಿಪಂದಿ (24) ಬಾಳೆ ಪಣ್ಣ್ (ಇದೊಂಡ ವಿವರ ಮಿಂಞಾಕ್) (25) ಬಾಳೆಪಣ್ಣ್ ಚೊಡಂಗೆ ಕಡ್ಡಿ (26) ಪಲುಂಬು (27) ತೆಳೋನೀರ್

ಕುಳಿಕಾರ ಕುಳಿಕಾರ್ತಿ : ಪೊಲಾಕತಿಂಜಿ ಒಂದೂ ಮೇಂಗತೆ ಇಂಜಿತ್ ಕುಳಿಪಂಜಿ, ಮಡಿ ಬಟ್ಟೆಲ್ ಕಾರಣಂಗ್ ಕನ್ನಿ ಕೋಂಬರೆಲ್ ಕೋಳಿ ನೆರ್ಚಿತ್, ಕೈಮಡತ್ ಕೋಳಿ ಪಂದಿ ಅರಾತಿತ್, ಕೈಮಡತ್ ಅಡಿಗೆ ಮಾಡಿತ್ ಎಡೆ ಇಡುವ. ಇದ್ ಕುಳಿಕಾರಂಡ ಕೆಲಸ. ಎಕ್ಕಾಲೂ ಒಕ್ಕತಾರ ಆಣ್ ಕುಳಿಕ್ ನಿಕ್ಕಂಡು. ಎಲ್ಲಾ ಎಡೆನ ಕುಳಿಕಾರನೇ ಇಡೊಂಡು.

ಕುಳಿಕಾರ್ತಿ : ಐನ್ ಮನೆಲ್ ಕಾರಣಂಗ್ ನೆರ್ಚಿ ಕೋಳಿನ ಎಡೆಕ್ ಉಳ್ಳ ಅಡಿಗೆನ ಕುಳಿಕಾರ್ತಿ ಮಾಡುವ. ಕೈಮಡಕ್ ಪೋಪಕ ಕೈಮಡಕ್ ಉಳ್ಳ ಸಾಮಾನ್ತನ ಕುಳಿಕಾರ್ತಿ ಬಟ್ಟಿಕ್ ತುಂಬ್ಚಿಡುವಂಜಿ ನೆಲ್ಲಕ್ಕಿ ನಡು ಬಾಡೆಲ್ ಬೆಪ್ಪ. ಓರಂದ್ ಒಕ್ಕತ್ ಒಕ್ಕತಾರ ಕನ್ನಿ ಮೂಡಿಯ ತಾಮನೆ ಮೂಡಿಯ ಬಾಕೆ ಬಂದವೂ ನಿಪ್ಪ.

ಕುಳಿಕಾರನೂ ಕುಳಿಕಾರ್ತಿಯೂ ಎಡೆ ಮೇಂಗ್ನ ಪಿಂಞ ಬಾಕಿ ಉಳ್ಳವೂ ಎಡೆ ಮೇಂಗುವ.

ಕಾರಣಕೊಡ್‌ಪ ಸಾಮಾನ್ :

1. ಪಾಲ್ : ಪಯ್ಯು ಪಾಲ್. ತರಕಾರಿ ಕರಿ, ಮೊದ್‌ರ ಮಾಡಿತ್ ಕಾರಣಂಗ್ ಕೊಡ್‌ಪಲ್ಲಿ ಪಯ್ಯುಪಾಲ್ ಬೆಪ್ಪ. ಪಾಲ್ ಬೆಚ್ಚಿತ್, ಮೊದುರ ಮಾಡುವ.
2. ಚಾಣ : ಬಲ್ಯಮನೆ ಕೈಮಡ ಮೊಕ್ಕುವಕ್ ಪಯ್ಯುಚಾಣ.
3. ಪೊಳಿಬಟ್ಟಿ : ನೆಲ್ಲಕ್ಕಿ ನಡುಬಾಡೆಲ್ ಕೊಡಿಯಲೆ ಅಡಿಕೆ, ತೆಂಗಿ, ಅಕ್ಕಿ, ತಿರಿ, ಎಣ್ಣೆ, ಕಳ್ಳ, ಪೊರಿ, ಬಾಳೆಪಣ್ಣ, ಗಿಂಡಿ, ಮಂಜಪೊಡಿ, ಚುಣ್ಣ, ಬಾಳೆಪಟ್ಟೆ, ಕೊಡಿಬಾಳೆ ಎಲಕಣ, ಕೋತಿರಿ ಚಳ್ಳೆ, ಕತ್ತಿ, ಅಕ್ಕಿಪೊಡಿರ ಒಟ್ಟಿ, ಬಾಳೆ ಒಟ್ಟಿ, ಬಾಳೆ ನುರಾಕ್, ಊದುಬತ್ತಿ, ಕಪೂರ, ಚುಟ್ಟು, ಸಿಗರೇಟ್, ಬೀಡಿ, ನಸ್ಯ ಕಂಚ್ಚಿರ ಚೊಂಬಾಲ್ ನೀರ್, ಗಿಂಡಿ, ಅಡಿಗೇಕ್ ಉಳ್ಳ ಸಾಮಾನ್‌ನ ಕುಳಿಕಾರನೂ ಕುಳಿಕರ್ತಿಯೂ ದುಂಬ್‌ಚಿಡುವ.
4. ಕೊಡಿಯಲೆ ಅಡಿಕೆ : ಇದ್ ನೆಲ್ಲಕ್ಕಿ ನಡು ಬಾಡೆಲ್ಲೂ ಪಿಂಞ ಕೈಮಡತ್ ತಳಿಯತ್ ಅಕ್ಕಿರ ಮೇಲೆ ಬೆಪ್ಪ. ಇದ್‌ತ್ ಮೂಂದ್ ಕೊಡಿಯಲೆ ಪಿಂಞ ಮೂಂದ್ ಅಡಿಕೆ ಬೋಂಡು.
5. ಅಕ್ಕಿ : ಕಾರಣ ಕೊಡ್‌ಪಕ. ಕನ್ನಿಕೋಂಬರೆ, ಕೈಮಡ, ನೆಲ್ಲಕ್ಕಿ ನಡುಬಾಡೆಲ್ ಕಾರಣನ ತೊತ್ತಿತ್ ಅಕ್ಕಿ ಇಡುವದ್ ಇದ್‌ಂಡ ಪ್ರಾಮುಖ್ಯತೆ.
6. ತಳಿಯತ್ತಕ್ಕಿ ಬೊಳ್‌ಚಿ : ಕಚ್ಚಿರ ತಟ್ಟೆಲ್ ಸಣ್ಣ ಅಕ್ಕಿ ಮೀದಲ್ ಕಚ್ಚಿರ ಬೊಳ್‌ಚಿತ್ ಪೈನೇಯಿ ಬೂಕುವಂಜಿ ಮಡಿ ಬಟ್ಟೆರ 3 ತಿರಿ ಪಟ್ಟ್ (ಕೈಚೋಕ) ಮೂಂದ್ ಕೊಡಿಯಲೆ ಅಡಿಕೆ ಬೆಚ್ಚಿತ್ ಬೊಳ್‌ಚಿ ಕತ್‌ಚಿಡುವ...

7. ಎಣ್ಣೆ ತಿರಿ : ಶುದ್ಧ ಬಟ್ಟೆರ ಒರ್ ಬೆರ ಅಗಲತ್ತರ ಒರ್ ಗೋಣಿ ಉದ್ದತ ತಿರಿಚುಡುವಂಜಿ ಮಾಡುವ. ಬಟ್ಟೆರ ತಿರಿ ಎಚ್ಚಕ್ ಎಡೆ ಬೆಪ್ಪ ಅಚ್ಚಕ್ ಬೋಂಡು. ಓರಂದ್ ಜಾಗತ್ ಪರ್ತಿರ ತಿರಿ ಸಹ ಮಾಡುವ ತಿರಿಕ್ ನಲ್ಲ ಎಣ್ಣೆ ಮುಕ್ಕಿತ್ ಒರ್ ಬಾಳೆ ಎಲಕಣತ್ ಸುತ್ತಿತ್ ಬೆಪ್ಪ.
8. ಕೋತಿರಿ : ಒರ್ ಮೊಳ ಉದ್ದತಾರ ಪೊನೆ ಕಡ್ಡಿ ಇಲ್ಲೇಂಗಿ ತೆರಿಗೆ ಎಲೆರ ಕಡ್ಡಿಕ್ ಮಡಿ ಬಟ್ಟೆನ ಕಡ್ಡಿರ ಪಾದಿ ಕೆತ್ತನೆಕೆ ಸುತ್ತಿತ್ ಕಡ್ಡಿರ ಅಡಿನ ಮೊನೆ ಮಾಡಿತ್ ನಲ್ಲ ಎಣ್ಣೆ ಮುಕ್ಕಿತ್ ತಟ್ಟ್ಪ ತಡೆಕ್ ಕುತ್ತಿತ್ ಕತ್ತಚುಡುವಾಂಗ್ ಕೋತಿರಿ ಎಣ್ಣುವ.
9. ಕುದ್ಡಿ : ಚೆರಿಯ ಗಂಜಿಕ್ ನೀರ್ ಬೂಕಿತ್ ಅದಂಗ್ ಚುಣ್ಣ, ಮಂಜಪೊಡಿ ಮಿಶ್ರ ಮಾಡ್ಚೇಂಗಿ ಚೋಪು ಬಣ್ಣತಾರ ನೀರ್ ಆಪ. ಇದ್ ಕುದ್ಡಿ. ಅರತ ಕೋಳಿರ ತೊಂಡೆನ ಕುದ್ಡಿ ನೀರ್ ಮುಕ್ಕಿತ್ ಪೊರಮೆ ಚಾಡುವ.
10. ಚಳ್ಳೆ : ಪಲಚಿಮರ (ಚೆಕ್ಕಿಮರ) ತ್ತೆರ ಎಲಕಣಕ್ ಮೊರಡ್ ಬರಿನ ಒಳುಬರಿಕ್ ಮಡಕಿತ್ ಚೆರಿಯ ಕಡ್ಡಿ ಕುತ್ತಿತ್ ನೀರ್, ಕಳ್ಳೆ ಬೂಕುವಕ್ ನಿಪ್ಪನೆಕೆ ಮಾಡ್ನ ಎಲಕಣಕ್ ಎಣ್ಣುವೊ ಚಳ್ಳೆ.
11. ಬಾಳೆ ಪಟ್ಟೆ : ಬಾಳೆ ದಿಂಡ್ನ ಕೆತ್ತಿತ್ ಪಟ್ಟೆ ಅಳಾಕಿತ್ ದಂಡ್ ಬೆರ ಅಗಲತ್ ಒರ್ ಮೊಳತ್ತಿಂಜಿ ಒರ್ ಕೈ ಉದ್ದಕೆತ್ತನೆಕ್ ಮೂಂದ್ಂಜಿ ಒಯಿಂಬದ್, ಪದಿನೆಟ್ಟ್ ಕೆತ್ತನೆಕ್ ಪಟ್ಟೆ ಮಾಡುವ. ಓರಂದ್ ಜಾಗತ್ ಓರಂದ್ ತರ ಕಳ್ಳೆ ಮಾಡುವ. ಒಯಿಂಬದ್ಂಜಿ ತೊಂಬತ್ತ ಒಂದ್ಕೆತ್ತನೆಕ್ ಇಪ್ಪ.
12. ಕೊಡಿಬಾಳೆ ಎಲೆ : ಎಡೆ ಬೆಪ್ಪಕ ಒನಲಿಕ್ ಬಿರಿಪಕ್ಕ ಎಲ್ಲಾ ಎಡೆಕ್

ಓರಂದ್ ಕೊಡಿಬಾಳೆ ಎಲೆ ಅದೂ ವಿಷಮ ಸಂಖ್ಯೆಲ್. ಇದ್ ಎಡೆಕ್ ಕಳ್ಳ ಪಿಂಞ ನೀರ್ ಬೂಕ್‌ವಕ್ ಮಾಡುವ.

13. ನೆಲ್ಲ್‌ರ ಪೊರಿ : ನೆಲ್ಲ್‌ನ ಬರತ್ತಕ್ಕ ಪೊರಿ ಆಪ ಇದ್‌ನ ಎಡೆಕ್ ಇಡುವ.
14. ಒಟ್ಟಿ : ಎಡೆಕ್ ಉಳ್ಳ ಒಟ್ಟಿನ ಅಕ್ಕಿ ಪೊಡಿಲ್ ಕಳ್‌ಂದಿತ್ ಮಾಡುವ.
15. ಬಾಳೆ ಒಟ್ಟಿ : ಬಾಳೆಪಣ್ಣ್ ಅಕ್ಕಿಪೊಡಿನ ನುರಾಕಿತ್ತ ಒಟ್ಟಿ ಚುಡುವ.
16. ಕಳ್ಳ : ಏದೇ ತರತಾರ ಕಳ್ಳ ಆಪ. ಎಡೆ ಬೂಕಿತ್ತಾನದು ಕುಡಿಕಲು. ಆಂಗ್‌ಂಜಿ ಮಿಂಞ ಆಗ.
17. ತೆಂಗ : ಬಟ್ಟಿಲ್ ಕೊಂಡಪೋಪ ತೆಂಗನ ಎಡೆ ಬೆಚ್ಚಿತಾನದು ತೆಂಗೆ ಒಡಾತಿತ್ ಎಲ್ಲಾ ಎಡೆಕ್ಕೂ ಚೆನ್ನ ಚೆನ್ನ ಬೂಕಿತ್ ಚೂರ್ ಮಾಡಿತ್ ಓರಂದ್ ಚೂರ್ ಇಡುವ. ತಟ್ಟ್ ಮಾಡುವಲ್ಲಿ ತೆಂಗನ ದಂಡ್ ಒಡೆ ಮಾಡಿತ್ ಇಡುವ.
18. ಬಾಳೆನುರಾಕ್ : ಬಾಳೆ ಪಣ್ಣ್‌ನ ಅಕ್ಕಿ ಪೊಡಿಲ್ ನುರಾಕಿತ್ ಎಣ್ಣೆಲ್ ಬರ್‌ಪ.
19. ಕತ್ತಿ : ಇರುಂಬಾರ ಕತ್ತಿ ತೆಂಗ ಒಡ್‌ಪಕ್.
20. ಗಿಂಡಿ : ಇದ್ ಪಾಲ್ ನೀರ್ ಬೆಚ್ಚವಕುಳ್ಳ ಕಚ್ಚಿರ ಪಾತ್ರ.
21. ಕಚ್ಚಿ ಚೊಂಬ : ಇದ್ ಎಡೆ ಶುದ್ಧ ಮಾಡುವಕುಳ್ಳ ನೀರ್ ಬೆಚ್ಚವಕ್.
22. ಚೂಡುಂಗರೆ ಕಡ್ಡಿ : ಓರ್ ಕೈ ಉದ್ದತಾರ ಪಚ್ಚಿ ಪೊಣೆರ ಕಡ್ಡಿ, ಇರುಂಬುರ ಕಡ್ಡಿ, ಕೊಡೆರ ಕಡ್ಡಿ ಇದ್‌ಂಡ ಸಹಾಯತ್ ಕೋಳಿರ ತೊಂಬೆ, ಪರಂಡೆ, ಪಂದಿರ ತೊಂಬೆನ ಚುಡುವಕ್ ಆಪ ಕಡ್ಡಿ ಚುಡುಂಗರೆ ಕಡ್ಡಿ.

23. ಕೋಳಿ, ಪಂದಿ : ಮಲ್ಲ ಕೋಳಿ (ತೈರ ಕೋಳಿ) ಏದೂ ಊನ ಇಪ್ಪಕಯ್ಯ. ಮಲ್ಲ ಕೋಳಿ ಇಲ್ಲತ ಪೋಚೆಂಗಿ ಮುಟ್ಟೆ ಇಡತ್ತ ಕನ್ನಿ ಪೋಡೆ ಕೋಳಿ ಆಪ.
24. ಬಾಳೆ ದಿಂಡ್ : ಕೈಮಡ ಪಟ್ಟಿಲ್ ಪಂದಿ ಅರ್ಪಕ್ಕಾ ಒರ್ ಮಾರ್ ಉದ್ದತಾರ ಬಾಳೆ ದಿಂಡ್‌ನ ಗುಂಡ್‌ರ ಅಡ್ಡ ಬೆಪ್ಪ.
25. ತ್ರಿಶೂಲ ಆಕಾರತಾರ ಒರ್ ಕಡ್ಡಿ ಮಾಡಿತ್ ಕೋಳಿರ ಪರಂಡೆ, ತೊಂಬೆ, ಪಂದಿರ ತೊಂಬೆನ ಚುಟ್ಟಿತ್ ಉಪ್ಪು, ಮಳು ಮೇಕಿತ್ ಕಡ್ಡಿರ ತುದಿಕ್ ಕುತ್ತಿತ್ ಬುಡತಾರ ಮಿಂಞಾಕ್ ಕುತ್ತುವ.
26. ಪಲುಂಬು : ಪಲುಂಬುನ ನೆಲ್ಲಕ್ಕಿ ನಡುಬಾಡೆಲ್ ಬಿರ್‌ಚಿತ್ ಅದ್‌ಂಡ ಮೀದ ಎಡೆ ಬೆಪ್ಪ.
27. ತೆಳ್‌ನೀರ್ : ಚೆರಿಯ ಕಚ್ಚಿರ ತಟ್ಟೆಕ್ ಚನ್ನಂಗ್ 1/2 ಚಮಚ ಬಾಣ, 1/2 ತಟ್ಟಿರ ಅಚ್ಚಕ್ ನೀರ್, ಚೆರ್ ಚಮಚತ್ತಾರ ಅಚ್ಚಕ್ ಕೂಳ್, ಚೆರಿಯ ದಂಡ್ ತಿತ್ ಕಂಡ ಇಟ್ಟಿತ್ತಿಪ್ಪ. ಇದ್‌ನ ಮೊಟ್ಟ್ ಕಂಡಿಲ್ ಬೆಪ್ಪ. ಇದ್‌ನ ಬೆರತ್ ಮುಟ್ಟಿತ್ ತಣುಚವ. ಕಾರುಬಾರ್ ಆನದು ಅದ್‌ನ ಅಲ್ಲಿಯೇ ಚೆಲ್ಲಿರುವ.

ಕಾರಣ ಕೊಡ್‌ಪ ನಾಳ್ ಕುರಿಪ

ಕಾರಣ ಕೊಡುವಪಕ್ ಎಟ್ತ್ ದಿನಕ್ ಮುಪ್ಪಡೆ ಪೊಲಾಕ ವಕ್ಕ ಪೆರಿಯಂವ ವಕ್ಕತಾರ ಬಾಕಿ ಪೆರಿಯ ಅಯಿಂಗಳ ಕೂಟಿಯಂಡ್ ಐನ್‌ಮನೆರ ನೆಲ್ಲಕ್ಕಿ ನಡು ಬಾಡೆಲ್ ಕಾರಣನ ತೊತ್ತಿತ್ ಅಕ್ಕಿ ಇಟ್ಟಿತ್, ತೊಂಬಕ್ಕೆ ಸಮೇತ ಬಾಳೆ ಕೊಲೆ ಪೊಲಾಕ ಕೆತ್ತುವ. ಕೆತ್ತನ ಕೊಲೆನ ಕನ್ನಿ ಕೋಂಬರೆಲ್ ತೂಕಿತ್ ದೂಪ ಪೊಗೆ ಕಾಟಿತ್ ಇದೇ ಕೊಲೆ ಪಣ್ಣ್‌ನ ಕಾರಣಂಡ ಎಡೆಕ್, ಒಟ್ಟಿ, ಪುಟ್ಟಾಕ್ ಉಪಯೋಗಿಚಿಡುವ.

ಇಂಥಾ ಚೆನ್ನ ಒಕ್ಕತ್ ಚಂಗ್ರಾದಿ ಕಯಿಂಜಿತ್ ಒಂದನೆ ಅಥವಾ ದಂಡನೆ ನಾರಾಚೆ ಅಯಿಂಗಡ ಸೌಕರ್ಯ ಪ್ರಕಾರ ಮಾಡಿಯವ. ಕಿಗ್ಗಟ್ವಾ ನಾಡ್‌ಲ್ ಬಿಶು (ವಿಶು) ಚಂಗ್ರಾದಿ ಕಯಿಂಜಿತ್ ಎಟ್ವಾ ಪತ್ತ್ ದಿವಸತ್‌ಲ್ ಅಯಿಂಗಡ ಸೌಕರ್ಯ ಪ್ರಕಾರ ಕೊಡ್‌ಪ.

ಕಾರಣಿಂಗ್ ಕೊಡ್‌ಪ ಪದ್ಧತಿ

ಐನ್‌ಮನೆರ ಕನ್ನಿ ಕೋಂಬರೆಲ್ ಕೋಳಿ ನೆರ್‌ಚಿತ್ ನೆಲ್ಲಕ್ಕಿ ನಡುಬಾಡೆಲ್ ಎಡೆ ಇಟ್ಟಿತ್ ಕ್ಯಾಕೊಳತಾರ ಪಕ್ಕ ಬೇಲ್ ಕರೆಲ್ ಎಡೆ ಬೆಚ್ಚಿತ್ ಎಡೆ ಮೇಂಗುವ.

ತುಲಾ ಸಂಕ್ರಮಣತ್ ಕುಲದೇವತೆರ ತೀರ್ಥ ಉದ್ಭವ ಆಯಿತ್, ಆದ್ಯ ನಾರಾಚೆಂದ್ ಕಾರಣಿಂಗ್ ಕೊಡುಪೊ ಎಣ್ಣೆಯಂಡ್ ಮಿಂಗಳೇ ತೀರ್ಮಾನ ಮಾಡಿಯವ. ಅಂದ್ ಪೊಲಾಕ ತಾಮನೆ ಮೂಡಿಯಡ ಬಳಗ, ಆ ಮನೆರ ಕೊರವುಕಾರ ಪಿಂಞ ಚೆನ್ನ ಇಷ್ಟ ಮಿತ್ರಂಗಳ ಕಾಕಿ ಕೂಟಿತ್ ಪತ್ತ್ ಪತ್ತರೆ ಗಂಟೆಕೆತ್ತನೆಕೆ ಪಾರಕಾತಿತ್ ಒಕ್ಕತಾರ ಒರ್ ಆಣ್ ಬಾಕೆ ಬಂದ ಒರ್ ಪೊಣ್ಣ್ ಕುಳಿಕಾರ್ತಿ ಆಯಿತಿಪ್ಪ. ಪತ್ತರೆ ಗಂಟೆಕ್ ನೆಲ್ಲಕ್ಕಿ ನಡು ಬಾಡೆಲ್ ಬಂದ್‌ಬಳಗತಾನ ಕೂಟಿಯಂಡ್ ಅಯಿಂಗಡ ಕೈಕ್ ಅಕ್ಕಿ ಕೊಡ್‌ತಿತ್ ವಕ್ಕ ಪೆರಿಯಂವ ಕಾರಣನೆ ಇನ್ನನೆ ಎಣ್ಣೆತ್ ತೊಪ್ಪ.

“ಗುರು ಕಾರಣನೆ ವಕ್ಕತಾರ ಎಲ್ಲಾ ಜನಕೂ, ತಾಮನೆ ಮೂಡಿಯಡ ಸಂಸಾರಕೂ ಆಯಿರ ಆರೋಗ್ಯ ಭಾಗ್ಯ ಕೊಡ್‌ತಿತ್ ಎತ್ತ್, ಕಡ್‌ಚಿ, ಬಿತ್ತ್, ಬೊಳೆಕ್ಕೂ, ವಿದ್ಯಾಭ್ಯಾಸ, ತೋಟ ತೊಡಿಯಕೂ, ಪೋನಲ್ಲಿ, ಬಂದಲ್ಲಿಯೂ, ಚಾಕರಿ, ವ್ಯಾಪಾರ, ಆಳ್‌ಕಾಳ್, ಕೋರ್ಟ್ ಕಛೇರಿ ಪಿಂಞ ಎಂತೆಂಗಿ ಕಾರ್‌ಬಾರ್‌ಕೂ ತಟ್ತ್ ತಡೆ ಇಲ್ಲತೆ, ತಿದ್ದಿ ನೀಕಿ ತರಂಡು. ಇಂದೇತ್‌ರ ಕುಳಿಕಾರ, ಕುಳಿಕರ್ತಿ ಆಯಿತ್ ಇಂತವೂ ನಿಂದಿತ್.

ಎಲಾರ್‌ಕೂ ನಲ್ಲದ್ ಮಾಡಿ ತರುಂಡೂಂದ್ ಬೋಡಿಯೆಂಡ್ ಕಾರಣಿಂಗ್ ಕೊಡ್‌ಪ ಕಾರ್‌ಬಾರ್‌ನ ಶುರು ಮಾಡುವ. ಇದ್‌ಂಗ್ ಒರೂ ಅಡೆತಡೆ ಇಲ್ಲತೆ ಆಪನ್ನೆಕೆ ನಲ್ಲದ್ ಮಾಡ್" ಎಣ್ಣೆತ್ ಕಾರಣಿಂಗ್ ಅಕ್ಕಿ ಇಟ್ಟಿತ್ ಎಲ್ಲಾರೂ ಅಡ್ಡ ಬೂವ.

ವಕ್ಕ ಪೆರಿಯಂವ ಕುಳಿಕಾರನೂ ಕನ್ನಿ ಕೋಂಬರೆಕ್ ಪ್ರೋಯಿತ್ ಕೊಡತ್‌ರ ಒಳ್‌ಲ್ ಉಳ್ಳ ಮಂಬೊಳಚತ್‌ರ ಮಿಂಞ ನಿಂದಿತ್ ಕಾರಣನ ತುದ್‌ಚಿತ್ ಕಾಲ್ ಕತ್ತನ ವಕ್ಕತ್‌ರ ಮಲ್ಲ ಕೋಳಿರ ಕಾಲ್ ಕಟ್ಟ್ ಕೈಯಿಚಿತ್, ಕುಳಿಕಾರ ಕೋಳಿರ ಬಾಯಿಕ್ ಅಕ್ಕಿ ಇಟ್ಟಿತ್ ಕೋಳಿನ ಅಲ್ಲಿ ಇಡ್‌ವ. ತಾಮನೆ ಮೂಡಿಯ ಬೆಂಧುಬಳಗ ಕೊಂಡ್ ಬಂದ ಕೋಳಿಯಳ ನೆರ್‌ಚಿತ್ ಕನ್ನಿ ಕೊಂಬರೆಲ್ ಇಡುವ.

ನೆಲ್ಲಕ್ಕಿ ನಡುಬಾಡೆಲ್ ಬೆಂಧು ಪಿಂಞ ಮನೆಕಾರ ಕೊಂಡ್‌ಬಂದ ಕಳ್ಳನ ಒರ್ ಪೊಳಿ ಪಚ್ಚಿಯತ್ ಇಟ್ತ್ ಬೆಪ್ಪ.

ವಕ್ಕ ಕೋಳಿನ ಕುಳಿಕಾರನೂ ಕುಳಿ ಕರ್ತಿಯೂ ಮನೆರ ಒಳ್‌ಲೇ ಚಾಯಿ ಮಾಡಿತ್ ಬಾಕಿ ಉಳ್ಳ ಕೋಳಿಯಡ ತೊಂಬೆ ಪರಂಡೆ ಎಡ್‌ತಿತ್ ಮೀದಿಕ್ ಉಳ್ಳ ಅಡುಗೆ ಮಾಡುವ. ವಕ್ಕ ಕೋಳಿರ ತೊಪ್ಪಟ ಕರುಬಟ್ಟಿನ ಅಲ್ಲಿಯೇ ಪೊಳಿ ಪಚ್ಚಿಯತ್ ಇಟ್ತ್ ಬೆಪ್ಪ. ಕಾರಣ ಕೊಡ್‌ತಿತ್ ಆನದು ಅದ್‌ನ ಪೊರಮೆ ಚಾಡುವ. ಕುಳಿಕಾರನೂ ಕುಳಿಕರ್ತಿ ಮಾಡ್‌ನ ಅಡಿಗಿನ ಕೂಳ್, ಕೂಟ ಕರಿ, ಬಾಳೆ ಒಟ್ಟಿ, ಬಾಳೆ ಪುಟ್ಟಿ, ನೆಲ್ಲರ ಪೊರಿ ಇದ್‌ನ ಎಡೆಕ್ ಬೆಪ್ಪ. ಇಂಞೋರ್ ಬರಿಲ್ ಪಲ್ಯ ಪಾಯಸ, ಕೋಳಿಕರಿ, ಕೋಳಿ ಬರ್ತದ್ ಕೂಳ್ ಇಂತಾನ ಮನೆ ಕರ್ತಿಯ ಇಲ್ಲೆಂಗಿ ಅಡಿಗೇಕಾರ ಮಾಡುವ. ಇದ್‌ನ ಎಡೆಕ್ ಕೊಡ್‌ಪದಿಲ್ಲೆ.

ಕುಳಿಕಾರನು ಕುಳಿಕರ್ತಿಯು ಅಡಿಗೇ ಆನದು ನೆಲ್ಲಕ್ಕಿ ನಡುಬಾಡೆಲ್ ಒರ್ ಪಲಿಯತ್‌ರ ಕೊಡಿಲ್ ಒರ್ ಗಿಂಡಿಲ್ ಅಕ್ಕಿ ಕೊಂಡಬಂದ ನೀರ್,

ಒರ್ ಗ್ಲಾಸ್ ಪಿಂಚಾ ಮೀದಿ ಬಟ್ಟಲ ಬೆಪ್ಪ. ನೆಲ್ಲಕ್ಕಿರ ಅಡಿಲ್ ಪಲುಂಬು ಬಿರ್ಚಿತ್ ಅದಾಂಡ ಮೇಲೆ ಬೊಳಾತ ಮಡಿ ಬಟ್ಟೆ ಬಿರ್ಚಿತ್ 31 ಕೊಡಿ ಬಾಳೆ ಎಲಕಣ ಬೆಪ್ಪಂಜಿ ಎಡೆಕ್ ಮಾಡ್‌ನ ಅಡಿಗಿನ ಕುಳಿಕಾರನೂ ಕುಳಿಕರ್ತಿಯೂ ಬಾಳೆ ಒಟ್ಟಿ, ಬಾಳೆನುರ್‌ಕ್, ಪೊರಿನ ಮೀದಿ ಬಟ್ಟಲಕ್ ಇಡುವ. ಅನ್ನನೆ ಎಲ್ಲಾನ ಚನ್ನ ಚನ್ನ ಎಡೆಕ್ ಇಡುವ. ಕೊಂಡಬಂದ ಕಳ್ಳನೆಲ್ಲ ಪೊಳಾಚಿತ್ ಒರ್ ಗ್ಲಾಸ್‌ಕ್ ಚನ್ನ ಚನ್ನ ಬೂಕುವ. ಅದಾತ್‌ಂಜಿ ಕಾಲ್ ಗ್ಲಾಸ್ ಕಳ್ಳ ಎಡ್‌ತಿತ್ ಮೀದಿ ಪಲಿಯತ್‌ರ ಮೇಲೆ ಬೆಚ್ಚಿ ಗ್ಲಾಸ್‌ಕ್ ಬೂಕುವ. ಬಾಕಿ ಕಳ್ಳನ 31 ಎಡೆರ 31 ಚಳ್ಳೆಕ್ ಚೆನ್ನಂಗ್ ಚೆನ್ನಂಗ್ ಬೂಕುವ. ಕುಳಿಕಾರನೂ, ಕುಳಿಕರ್ತಿಯೂ, ವಕ್ಕ ಪೆರಿಯಂಪನೂ ಕನ್ನ ಕೋಂಬರೆರ ಗೋಡೆರ ಒಳಾಲ್ ಉಳ್ಳ ಕೊಡತ ಮೀದಿ ಬೆಚ್ಚಿತ್ ನೆಲ್ಲಕ್ಕಿ ನಡುಬಾಡೆಕ್ ಬೆಪ್ಪ. ನೆಲ್ಲಕ್ಕಿ ನಡು ಬಾಡೆಲ್ ಬಂದ್ ಕೂಡ್‌ನಯಿಂಗಳ ಕಾಕಿ ಕೂಟಿತ್ ಎಲ್ಲಾರ್‌ಕೂ ಅಕ್ಕಿ ಕೊಡ್‌ತಿತ್ ನೇರ್ತೆ ಕಾರಣನ ತೊತ್ತ ಅನ್ನಕ್ಕೆ ಅಲ್ಲತೆ ಅದಾಂಗ್ ಚನ್ನ ವಕ್ಕಣೆ ಕೂಟುವ. ಕುಳಿಕಾರನೂ ಕುಳಿಕರ್ತಿಯೂ ಮಾಡ್‌ನ ಅಡಿಗೆ ಬೆಚ್ಚಿ ಎಡೆಲ್ ಎನ್ನೇಂಗಿ ತಪ್ಪು ನೆಪ್ಪು ಉಂಡೇಂಗಿ ಅದಾನ್ ಒಪ್ಪ ಮಾಡಿಯ ಕಾರಣ ಎಣ್ಣವಂಜಿ ಅಕ್ಕಿ ಇಡುವಂಜಿ ಅಲ್ಲಿಂಜಿ ಚನ್ನನೇರ ಕಯಿಂಜದು ಒರ್ ಪೊಳಿ ಪಚ್ಚೆಕ್ ಇದಾನೆಲ್ಲಾ ಇಟ್ಟಂಡ್, ಒರ್ ಕುಪ್ಪಿ ಕಳ್ಳ, 2-3 ಗ್ಲಾಸ್, ಮಾಡ್‌ನ ಒಟ್ಟಿ, ಪುಟ್, ತೆಂಗೆ, ತಿತ್‌ಕೊಳ್ಳಿ, ಕತ್ತಿ, ಊದುಬತ್ತಿ ಇಚ್ಚಕಾನ ಕುಳಿಕಾರನೂ, ಕುಳಿಕರ್ತಿಯೂ ಎಡ್‌ತಂಡ್ ಬಾಕೆ ಬಂದ ಅಯಿಂಗಳ ಕೂಟಿಯಂಡ್ ಕ್ಯಾಕೊಳತರ್ ಪಕ್ಕ ಪೋಯಿತ್ ಪಿಲ್ಲರ ಮೇಲೆ ಕುಳಿಕಾರ ಚೊಂಬುರ ನೀರ್‌ನ ಚಾಣಕ್ ಮಿಶ್ರಮಾಡಿತ್ ತಣಿಪಂಜಿ ಶುದ್ಧ ಮಾಡುವ.

ಕುಳಿಕಾರನೂ, ಕುಳಿಕರ್ತಿಯೂ ಬಟ್ಟಿಂಜಿ ಎಡೆನ ಎಡ್‌ತಿತ್ ಸಾಲ್‌ಕ್ ಬೆಚ್ಚಿತ್ ಎಲ್ಲಾ ಎಡೆಕ್ ತಿರಿತ್‌ಚಿಡುವಂಜಿ ತೆಂಗಿನ ಒಡ್‌ತಿತ್ ಎಲ್ಲಾ ಎಡೆಕ್ ಚನ್ನ ಚನ್ನ ತೆಂಗೆ ನೀರ್ ತಣಿಪ. ತೆಂಗೆ ಪೊಳಿ ಒಟ್ಟಿತ್ ಎಲ್ಲಾ

ಎಡೆಕೂ ಇಡುವ. ಚುಟ್ಟ ಕತ್ತಚಿಟ್ಟಿತ್, ಊದ್‌ಕಡ್ಡಿ ಕತ್ತಚಿಟ್ಟಿತ್ ಬಾಳೆ ಪಣ್ಣ್‌ಕ್ ಕುತ್ತುವಂಜಿ ಬೆಪ್ಪ. ತಿತ್ತಕೊಳ್ಳಿಕ್ ಧೂಪ ಇಟ್ಟಿತ್ ಪೊಗೆ ಕಾಟಿತ್ ಎಲ್ಲಾರೂ ಕೂಡಿತ್ ಅಕ್ಕಿ ಇಡುವಂಜಿ ಕುಳಿಕಾರನೂ, ಕುಳಿಕರ್ತಿಯೂ ಕೈಕ್ ನೀರ್ ಬೂಕಿಯಂಡ್ ಮೂಂದ್ ಮೂಂದ್ ಕುರಿ ಚಪ್ಪಾಳೆ ತಟ್ಟಿತ್ ಕಾ, ಕಾ, ಕಾ, ಎಣ್ಣಿಯಂಡ್ ಮೂಂದ್ ಕುರಿ ಕಾಕುವ. ಅನ್ನನೆ ಬಂದಯಿಂಗ ಎಲ್ಲಾ ಕೈಕ್ ನೀರ್ ಬೂಕಿಯಂಡ್ ಅನ್ನನೆ ಕಾಕುವ.

ಪಚ್ಚಿಯತ್ ಉಳ್ಳ ಕಳ್ಳ, ಕರಿ, ಒಟ್ಟಿ ಎಡ್‌ತಂಡ್ 50 ಮಾರ್ ಬಯ್ಯಕ್ ಬಪ್ಪಂಜಿ ಎಲ್ಲಾನೋ ತಿಂದ್ ಕುಡ್‌ಚಿ ಖಾಲಿ ಮಾಡುವ. ಪಚ್ಚಿಯತ್ತನ ಗಂಜಿನ ಓಣಿರ ತಲೇಲ್ ಬೆಚ್ಚಿತ್ ಬೊರಿ ಕೈಲ್ ಬಪ್ಪಂಜಿ ಬಲ್ಯಮನೆರ ಮೊಟ್ಟ ಕಂಡಿಲ್ ಕೈಕಾಲ್ ಕತ್ತಿತ್, ತಳಿಯತ್ ಬೆಚ್ಚಿ ತೆಳ್ ನೀರ್‌ನ ತಣ್‌ಚಂಡ್ ಒಳ್‌ಕ್ ಬಂದಿತ್, ನೆಲ್ಲಕ್ಕಿಕ್ ಅಡ್ಡ ಬುದ್ದಿತ್ ಮಾಡ್‌ನ ಅಡಿಗೇ, ಕಳ್ಳನ ತಿಂದ್ ಕುಡ್‌ಚಿ ಎಲ್ಲಾರೂ ಕೈಕಾಲ್‌ಪುಡ್‌ಚಿತ್ ಬೆಂದ್ ಪಿರಿಯುವ.

ವಿಶೇಷ : ಏದೂ ಕಾರಣಕ್ಕೂ ತಾಮನೆ ಮೂಡಿಯ ಕುಳಿಕ್ ನಿಪ್ಪನ್ನೆಕೆ ಇಲ್ಲೆ. ಎಡೆ ಮುಟ್ಟುವನ್ನೆಕೆ ಇಲ್ಲೆ. ಬಲ್ಯಮನೆರ ಎಡತೆ ಬರಿಲ್ ಮಸಣೆ ಉಂಡ್ ಕೂಟ್‌ಕ್ಕಾರಂಗ್ ಎಡೆ ಇಲ್ಲೆ.

(ಈ ತರ ಕಾರಣ ಕೊಡ್‌ಪದ್ ನಲುವತ್ತೊಕ್ ಗ್ರಾಮತಾರ ಮುಕ್ಕಾಟಿರ ಅಲ್ಲಿ ಕಂಡ್ ಬಪ್ಪ.)

(ಮಾಹಿತಿ : ಮುಕ್ಕಾಟಿರ ಬಿ. ಭೀಮಯ್ಯ)

2. ಕನ್ನಿ ಕೋಂಬರೆಲ್ ಕೋಳಿ ನೆರಾಚಿತ್ ನೆಲ್ಲಕ್ಕಿ ನಡುಬಾಡಲ್ ಎಡೆ ಇಟ್ಟಿತ್ ಅಲ್ಲಿಯೇ ಮೇಂಗಿತ್ ಪಿರಿಯುವ ಮದ್ರಿರ ಒಕ್ಕ, ಈಚೂರು ಗ್ರಾಮ.

ಕಾರಣ ಕೊಡ್‌ಪ ಒಂದನೆ ಪದ್ಧತಿಲ್ ವಿವರಿಚಿಟ್ಟನ್ನೆಕೆ ಈ ವಕ್ಕತ್

ಕಾರಣಚಿಹ್ನೆ ಮಾತ್ರ ಕೊಡುವ. ಎಲ್ಲಾ ಕಾರಣಬಾರ್ ಬಲ್ಯಮನೆರ ಒಳ್ಳೆಲ್. ಇಲ್ಲಿ ಕುಳಿಕಾರ ವಕ್ಕಕಾರನಾಯಿತ್ತಿಪ್ಪ. ಕುಳಿಕರ್ತಿ ಇಲ್ಲೆಂಗಿ ಕನ್ನಿ ಮೂಡಿ ಆಯಿತ್ತಿಪ್ಪ. ಕ್ಯಾಕೊಳಕ್ ಪೋಪ ಪದ್ಧತಿ ಇಲ್ಲೆ. ಕೋಳಿ ಮಾತ್ರ ಎಡೆಕ್.

3. ಬಲ್ಯ ಮನೆಂಜಿ ಎಡೆಕ್ ಉಳ್ಳ ಸಾಮಾನ್, ಕೋಳಿ ಎಡೆತಂಡ್ ಕೈಮಡಕ್ ಪೋಯಿತ್ ಎಡೆ ಇಟ್ಟಿತ್ ಮೇಂಗಿತ್ ಬಲ್ಯಮನೆಕ್ ಬಂದಿತ್ ಎಡೆ ಇಟ್ಟಿತ್ ಎಡೆನ ಓರಂದ್ ಕೋಂಬಕೆಕ್ ಬೆಚ್ಚಿತ್, ಕ್ಯಾಕೊಳಕ್ ಪೋಯಿತ್ ಎಡೆ ಬೆಚ್ಚಿತ್ ಮೇಂಗಿತ್, ಬಲ್ಯಮನೆಕ್ ಬಂದಿತ್ ಉಂಡ್‌ತಿಂದ್ ಪಿರಿಯುವ.

ಸಾಮಾನ್ಯ ಪದ್ಧತಿರನ್ನೆಕೆ ಕನ್ನಿಕೋಂಬರಲ್ ಕೋಳಿ ನೆರಾಚಿತ್, ಆ ಕೋಳಿನ ಕಾರಣಂಗ್ ಮೀದಿ ಬೆಪ್ಪ. ಬಾಕಿ ಬೆಂಧು ಕೋಳಿ, ಕಳ್ಳ, ಬಟ್ಟಿ ಸಾಮಾನ್ ಎಡೆತಂಡ್ ಕೈಮಡಕ್ ಪೋಯಿತ್ ಚಾಣ ನೀರಲ್ ಶುದ್ಧ ಮಾಡಿತ್, ಕೊಡಿ ಬಾಳೆ ಎಲಕಣ ಬೆಚ್ಚಿತ್, ಅದಂಡ್ ಕೊಡಿಲ್ ಬಾಳೆ ಪಟ್ಟಿರ ತಡೆ ಮಾಡಿತ್, ತಡೆರ ಒಳ್ಳೆಕ್ ಒಟ್ಟಿ, ಪೊರಿ ಇಟ್ಟಿತ್ ಕೋತಿರಿ ಕತ್ತಾಚಿಡುವಂಜಿ, ತೆಂಗೆ ಒಡಪ. ಕೋಳಿರ ಕಾಲ್ ಕತ್ತಿತ್ ಅದನ ಅರಾತಿತ್ ಚೋರೆನ ತಡೆಕ್ ಬೂಕುವ. ಕೋಳಿರ ಮಂಡೆನ ತಡೆಕ್ ಇಡುವಂಜಿ ಬೋಳೆರ ತುದಿನ ನೀರ್ ಮುಕ್ಕಿತ್ ಕೋಳಿನ ಪೊರಮೆ ಇಡುವ. ಅನ್ನನೆ ಎಲ್ಲಾ ಕೋಳಿ ಅರಿತಿತ್ ಆನದು ಕುರ್ದಿ ನೀರನ ಒಕ್ಕ ಕೋಳಿಕ್ ತಣ್ಣಚಿ ಪಿಂಞ ಕೋಳಿನೆಲ್ಲಾ ಎಡೆತಿತ್ ಒಕ್ಕ ಕೋಳಿರ ತೊಂಬೆ ಪರಂಡೆನ ಚುಟ್ಟಿತ್ ಎಡೆಕ್ ಚುಡುಂಗರೆ ಕುತ್ತುವ. ಬಾಕಿ ಉಳ್ಳ ಕೋಳಿಯಳ ಚುಟ್ಟಿತ್ ಉಪ್ಪು, ಮಳು, ಪುಳಿ ಮೇಕಿತ್ ಇಷ್ಟ ಆಪಚ್ಚಕ್ ಕಳ್ಳ, ಕೋಳಿ, ಪೊರಿ, ಒಟ್ಟಿ ತಿಂದಿತ್ ಬಲ್ಯ ಮನೆಕ್ ಪೋಪ.

ಬಲ್ಯಮನೆಕ್ ಬಂದಿತ್ ಕಾರಣಂಗ್ ನೆರಾಚೆ ಕೋಳಿನ ಒಂದನ ಪದ್ಧತಿಲ್ ಕಂಡನಕೆ ಎಡೆ ಇಡುವ. ಕಾರಣನ ಮಾಮೂಲ್ ಪೋಲೆ ತುದಿಪ.

ತಾಮನೆ ಮೂಡಿಯ ಅಯಿಂಗಡ ಅಜ್ಜ ತಾಯಿ, ಅಪ್ಪ-ಅವ್ವಂಗಡ ಕೋಂಬರೆಕ್ ಎಡೆ ಬೆಪ್ಪ. ಬಾಕಿ ಉಳ್ಳ ಎಡೆನ ಕ್ಯಾಕೋಳಕ್ ಎಡ್ತಪೋಯಿತ್ ಒಂದನೆ ಪದ್ಧತಿ ಪ್ರಕಾರ ಕಾರ್ಬಾರ್ ಮಾಡಿತ್ ಬಲ್ಯ ಮನೆಕ್ ಬಂದಿತ್ ಉಂಡ್ತಂದ್ ಪಿರಿಯುವ.

4. ಒಂದನೆ ಪದ್ಧತಿ ಪ್ರಕಾರ ಅಡಿಗೆ ಎಲ್ಲಾ ಮಾಡಿತ್ ಬಾಡೆಲ್ ಎಡೆ ಇಟ್ಟಿತ್, ಮೀದಿ ಬೆಪ್ಪಂಜಿ, ಕನ್ನಿ ಮೂಡಿಯ ಬಲ್ಯ ಬಲ್ಯ ಮನೆರ ಎಲ್ಲಾ ಕೋಂಬರೆಕ್ ಎಡೆ ಬೆಚ್ಚಿತ್ ಬಲ್ಯ ಮನೆಂಜಿ ಕೈಮಡಕೊತ್ತ ಬಟ್ಟೆ ಉದ್ದಕ್ಕೂ ಅಂಜಿ (5) ಎಡೆ ಬೆಚ್ಚಿತ್ ಕೈಮಡಕ್ ಬಂದಿತ್ 'ಬೂಡ'ತ್ತರ ಮೇಲೆ ಎಡೆ ಬೆಚ್ಚಿತ್ ಕಾರಣನ ತುದ್ಚಿತ್ ಅಕ್ಕಿ ಇಟ್ಟಿತ್ ಮೇಂಗಿತ್ ಬಲ್ಯ ಮನೆಕ್ ಬಂದಿತ್ ಕುಡ್ಚಿ, ಉಂಡ್ ಪಿರಿಯುವ.

ಚೌರೀರ ವಕ್ಕ ಪೋದ್ ಗ್ರಾಮ

ವಿಶೇಷ :

ವಕ್ಕತ್ತರ ಕನ್ನಿ ಮೂಡಿಯ ಕುಳಿಕರ್ತಿಯ ಎಲ್ಲಾ ಕೋಳಿಯಳ ಕನ್ನಿ ಕೋಂಬರೆಲ್ ನೆರಿಪ. ಬಲ್ಯ ಮನೆಲ್ ದಂಡ್ ತೂಕ್ಬೊಳ್ಚಿ, ಬಾಡೆರ ಎಡ್ತ ಬರಿ ಬೊಳ್ಚಿತ್ತರ ಕಾಲ್ ಪುಡಿಪ. ಎಡೆಕ್ ಇಂಡ್, ಮೀನು ಕರಿ ಪಿಂಞ ಅಂಜಿ (5) ತರ ತರಕಾರಿ ಕರಿ.

ನಾಲನೇ ಪದ್ಧತಿ : ಬಲ್ಯ ಮನೆಂಜಿ ಬಟ್ಟಿ ಕೋಳಿ ಪಂದಿ ಆಯಿತ್ ಕೈಮಡಕ್ ಪೋಯಿತ್ ಕೋಳಿ ಪಂದಿ ಅರ್ತಿತ್ ತಿಂದ್ ಕುಡ್ಚಿತ್ ಪಿರಿಯುವ.

ಬಲ್ಯ ಮನೆಂಜಿ ಒಂದನೇ ಪದ್ಧತಿ ಪ್ರಕಾರ ಕಾರಣನ ತುದಿಚಿತ್ ಬಟ್ಟಿ, ಬಾಳೆಕೊಲೆ, ಪಟ್ಟಿಲ್ ಬೆಚ್ಚಿ ವಕ್ಕ ಪಂದಿ, ಪರಿಕೆ ಪಂದಿನೊ ಎಡ್ತಂಡ್ ವಕ್ಕ ಪೆರಿಯುವ (ಕಾರಣ ತಿರುವಳ ಇಲ್ಲತ ಪೋಚೆಂಗಿ) ದಂಡ್ ಕೈಲ್ ದಂಡ್

ಗೆಚ್ಚೆ ತಂಡ್‌ನ ಪುಡ್‌ಚಿ, ಮಿಂಞಾತ್ ಪೋಪ. ಬಯ್ಯತ್ ಕುಳಿಕಾರ, ವಕ್ಕಕಾರ, ಬೆಂದು ಚಾಚೆ ಕೂಡಿ ಕೈಮಡಕ್ ಪೋಪ. (ಪೊಣ್ಣಾಳ್ ಮೂಡಿಮಕ್ಕ ಇಲ್ಲ)

ವಕ್ಕ ಪೆರಿಯಂವ ಮಿಂಞಾ ಪತ್ತಿತ್ ಒಳ್‌ಕ್ ಪೋಯಿತ್ ಒಳ್‌ಲ್ ಉಳ್ಳ ಬೂಡತಾರ ದಂಡ್ ಭಾಗಕ್ ದಂಡ್ ತಂಡ್‌ನ ಬೆಚ್ಚಿತ್ತಾನದು ಕುಳಿಕಾರ ಬೂಡಕ್ ಬೊಳ್‌ಚಿ ಕತ್ತಚಿಡುವ. ಪಟ್ಟಿಕ್ ಬಂದಿತ್ ಕೊಡಿಬಾಳೆ ಎಲಕಣತ್ತಾರ ಮೇಲೆ ಬಾಳೆಪಟ್ಟಿರ ತಟ್ಟಿ ಮಾಡಿತ್ (64 ಕಳ್ಳಿ) ಒಟ್ಟಿ ಪೊರಿ ಇಡುವ. ಬೂಡತಾರ ಮಿಂಞಾಕ್ ಕೊಡಿಬಾಳೆ, ಎಲಕಣ, ಪೊರಿ ಇಡುವಂಜಿ ಅದಂಡ ಮೀದ ತೆಂಗೆ, ಬಾಳೆಪಣ್ಣ್ ಬೆಪ್ಪಂಜಿ ಉದುಕಡ್ಡಿ ಕತ್ತಚಿಡುವಂಜಿ ಬೆಪ್ಪ. ಇದಂಗ್ ಗಣವದಿಂದ್ ಎಣ್ಣುವ.

ವಕ್ಕ ಕೋಳಿನ ಅರ್‌ಪಂಜಿ ಬೂಡತಾರ ಎದಿಕೆ ಪಾರತನ್ನೆಕೆ ಚಾವಲ್ಲಿ ಕೆತ್ತನೆಕೆ ಅವಂಕಿ ಪುಡಿಪ. ಕೈಮಡತಾರ ಒರ್ ಬರಿಲ್ ದಂಡ್ ಒಲೆ ಕೂಟಿತ್ ಕೂಳ್ ಕೂಟ್ ಕರಿಕ್ ಬೆಪ್ಪ. ಇದ್ ಆಕಣೆಕ್ ಪೊರಮೆ ಮಾಡ್‌ನ ತಡೆಕ್ ಕೋತಿರಿ ಕತ್ತಚಿಡುವಂಜಿ ಒಟ್ಟಿ ಪೊರಿ ಇಟ್ಟಿತ್ ಬಂದ ತೆಂಗೆನ್ನಾ ಒಡ್‌ತಿತ್, ಬಂದ ಕೋಳಿಯಳ ಅರಪಂಜಿ ಕುರ್ದಿ ನೀರ್‌ಲ್ ತೊಂಡೆನ ಮುಕ್ಕಿತ್ ಬರಿಲ್ ಇಡ್‌ವ. ಕೈಮಡತಾರ ಎದಿಕೆ ಉಳ್ಳ ತಡೆರ ಪಕ್ಕ ಒರ್ ಕುಂಡ್ ಕಳಕ್ ಪಡಿಂಞಾರ್ ಆಯಿತಿಪ್ಪ. ಇದ್‌ಂಡ ಮೇಲೆ ತೆಕ್ಕ ಬಡ್‌ಕ್ ಬಾಳೆ ದಿಂಡ್ ಬೆಪ್ಪ. ವಕ್ಕ ಪಂದಿರ ಕಾಲ್ ಕುಪ್ಪ್ ಕಯಿಚಿತ್ ತೊಂಡೆನ ದಿಂಡ್‌ರ ಮೇಲೆ ಬೆಚ್ಚಿತ್, ನಾಲ್ ಬರಿಕ್ ನಾಲ್ ಕಾಲನ್ ಬೆಚ್ಚಿತ್ ಪಂದಿಕ್ ಕುಳಿಕಾರ ಅಕ್ಕಿ ಇಡುವಂಜಿ ಪಂದಿ ಅರ್ಕೊಲುವಾ ಎಣ್ಣೆತ್ ಮೂಂದ್ ಕುರಿ ಕೇಟಿತ್ ಪಂದಿ ಅರ್‌ಪ. ಅನ್ನನೆ ಬಂದ ಪಂದಿಯಳ ಅರ್‌ಪ. ವಕ್ಕ ಪಂದಿರ, ಅರ್‌ತ ಕೋಳಿಯಡ ತೊಂಬೆ, ಪರಂಡೆ, ಪಂದಿರ ಗಟ್ಟಿ ತೊಂಬೆನ ಚುಟ್ಟಿತ್ ಬೆಪ್ಪ. ಅಕ್ಕಣೆಕ್ ವಕ್ಕ ಕೋಳಿನ ಕೈಮಡತಾರ ಒಳ್‌ಲ್ ಕರಿಮಾಡುವ. ವಕ್ಕ ಪಂದಿರ ಕೈಪರಕೆನ ಅಲ್ಲಿಯೇ ಕರಿ ಮಾಡುವ.

ಬೂಡತಾರ ಎದಿಕೆ 5 (ಅಂಜಿ) ಬಾಳೆ ಎಲೆ ಎಡೆಕ್ ಬೆಪ್ಪ. ಪಕ್ಕತ್ 2

(ದಂಡ್) ಗ್ಲಾಸ್ ಬೆಚ್ಚಿತಿಪ್ಪ. ಪೊರಿ, ಒಟ್ಟಿ, ಕೂಳ್, ತೊಂಬೆ, ಪರಂಡೆ ಚುಟ್ಟದ್, ಕಳ್ಳ, ಕೋಳಿಕರಿ, ಪಂದಿಕರಿ, ಕೂಟ್ಕರಿ, ಬಾಳೆಪಣ್ಣಾ ಇಚ್ಚಕಾನ ಆದ್ಯವಾಯಿತ್ ಬೂಡತರ್ ಒಳಕೂ, ಅಲ್ಲಿಂಜಿ ಮೀದಿ ಬಟ್ಟಲಕೂ ಚೆನ್ನ ಚೆನ್ನ ಇಡುವ. 5 (ಅಂಜಿ) ಎಡೆಕ್ ಚೆನ್ನ ಚಾಸ್ತಿ ಇಡುವ. 2 (ದಂಡ್) ಮೀದಿನ (2) ದಂಡ್ ಬಲ್ಯ ಮನೆಕ್ ಎಡ್ತಪೋಯಿತ್ ಮೀದಿ ಬೆಪ್ಪ. ಅಕ್ಕಣೆಕ್ ಇಲ್ಲಿ ಕೈಮಡಕ್ ಕಾರಣಂಗೆ ಅಕ್ಕಿ ಇಟ್ಟಿತ್ ತುದಿಪ. ಬಾಕಿ ಉಳ್ಳ ಕೋಳಿ, ಪಂದಿ ಎರ್ಚಿನ ಬಲ್ಯ ಮನೆಲ್ ಕರಿ ಮಾಡಿತ್ ಕೂಳ್ ಮಾಡಿತ್ ಕೈಮಡಕ್ ಅಯಿಪ. ಬಂದಾನ ಕೈಮಡತರ್ ತತ್ತಿಲ್ ಬೆಪ್ಪ.

ಕೈಮಡತರ್ ಎಡ್ತ ಬರಿ ಕನ್ನಿ ಕಂಬಾರ ಮೂಲೆಲ್ ಒರ್ ಐಮರತರ್ ಒರ್ ಬೆಂದೂನೊ ಇಂಇಶೋರ್ ಐಮರತ ಒರ್ ಊರ್ಕಾರನೊ ಪಕ್ಕ ಪಕ್ಕ ಅಳಪ. ಇಯಂಗಡ ಮದ್ಯತ್ ಕನ್ನಿಕಂಬ, ಒರ್ ಸ್ಪೂಲ್ ಬೆಪ್ಪ. ಆ ಸ್ಪೂಲರ್ ಎದಿಕೆ ಒರ್ ಕುರ್ಚಿ ಬೆಪ್ಪ. ಆ ಕುರ್ಚಿಕ್ ಒರ್ ಮಡಿ ಟವಲ್ ಬೆಚ್ಚಿತಿಪ್ಪ. ಕಾರಣ ತಿರುವಳ ಉಂಡೇಂಗಿ ಅದಲ್ ಅಳಪ. ಇಲ್ಲೇಂಗಿ ಖಾಲಿ ಇಪ್ಪ. ಚೊಂಬುಲ್ ನೀರ್ ಎಡ್ತಂಡ್ ಬೋಗುಣಿಕ್ ಇಯಂಗಡ ಕೈನ ಕುಳಿಕಾರ ಕತ್ತಚಿಡುವ. ಅಲ್ಲಿಂಜಿ ಸ್ಪೂಲರ್ ಮೇಲೆ ಬಲ್ಯ ಕೊಡಿಬಾಳೆ ಎಲಕಣ ಬೆಚ್ಚಿತ್ ಮೂಂದ್ ಗ್ಲಾಸ್ ಬೆಪ್ಪ. ಬೂಡತರ್ ಪಕ್ಕ ಒರ್ ಎಲೆ, ಒರ್ ಗ್ಲಾಸ್ ಬೆಚ್ಚಿತ್ ಕುಳಿಕಾರ ಮಾಡ್ನ ಅಡಿಗಿ ಪಿಂಇ ಕಳ್ಳ, ಬೂಕಿಯಂಡ್ ಕುಳಿಕಾರ ಎಡೆ ಮುಟ್ಟುವಾಂದ್ ಎಣ್ಣೆಯುಂಡ್ 3 (ಮೂಂದ್) ಕುರಿ ಕೇಪ. ಕೇಟಿತ್ ಎಡೆ ಮುಟ್ಟಿತಾನದು ಸ್ಪೂಲ್ ಬೆಚ್ಚಿ ಕೊಡಿಬಾಳೆ ಎಲಕಣಕ್ ಕುಳಿಕಾರ ಮಾಡ್ನ ಎಲ್ಲಾ ಅಡಿಗಿ ನ ಇಟ್ಟಿತ್ ಕಳ್ಳ, ಬೂಕಿತ್ ಕಾರಣ, ಬೆಂದು, ಊರ್ಕಾರನೊ ಎಡೆ ಮುಟ್ಟುಲುವಾಂದ್ ಕೇಪ. ಎಡೆ ಮುಟ್ಟುಲೂಂದ್ ಎಣ್ಣುವ. (ಬಲ್ಯ ಮನೆಂಜಿ ಬಂದ ಅಡಿಗಿ ನ ಕೂಟುವದಿಲ್ಲೆ)

ಅಕ್ಕಣೆಕ್ ವಕ್ಕಕಾರ, ಬೆಂದು ಚಾಚಿಯ ಕೈಮಡತಾರ ಸುತ್ತಾ ಅಳತಿತ್ ಕಳ್ಳ ಕುಡ್ಚಿತ್ ಉಂಬ. ಕಾರಣನೂ, ಬೆಂದು, ಊರ್ಕಾರನೂ ಕೈಬಾಯಿ ಒತ್ತತಾಂದ್ ಕೇಪ. ಸ್ಪೂಲ್‌ರ ಮೇಲೆ ಉಳ್ಳ ಬಾಳೆ ಎಲಕಣಕ್ ಕುಳಿಕಾರ ಮಾಡ್‌ನ ಅಡಿಗನ್ನೆಲ್ಲಾ ಓರಾಂದ್ ಕೈಕಣೆ ಇಟ್ಟಿತ್ ಅದ್‌ನ ಕೋತಿರಿ ಕತ್ತಚಿಟ್ಟಿತ್ ಕುಳಿಕಾರ ಕೊಂಡ ಪೋಯಿತ್ ಪಾಮರತಾರ (ಪಲ್‌ಚಿ) ಅಡಿ ಬೆಚ್ಚಿತ್ ಬಪ್ಪಂಜಿ ಸ್ಪೂಲ್ ಸುತ್ತ ಅಳತ್ ಅಯಿಂಗಡ ಕೈನ ಬೋಗುಣೆಕ್ ಕತ್ತಚಿಡುವ. ಕೈ ಕತ್ತಿತಾನದೂ ಬಾಕಿ ಉಳ್ಳವೂ ಏವಲು. ಅಲ್ಲಿಕೆತ್ತನೆಕ್ ದಾರೂ ಏವಕ್ಕಾಗ. ಸ್ಪೂಲ್‌ರ ಕೊಡಿಲ್ ಒರ್ ತಟ್ಟೆಲ್ ಕೊಡಿಯಲೆ, ಅಡಿಕೆ ಚುಣ್ಣೆ, ಬಾಳೆ ಪಣ್ಣೆ ಬೆಪ್ಪ. ಕೈಮಡತಾರ ಸುತ್ತಾ ಉಂಡವು ಉಂಡ ಎಲಕಣತಾನ ಎಡ್‌ಪಕ್ಕಾಗ.

ಕುಳಿಕಾರ ಬೂಡತಾರ ಎದಿಕೆ ಬೆಚ್ಚ 5 (ಅಂಜಿ)ಲ್ (3) ಮೂಂದ್ ಕುತ್ತಿಕಾರಕೂ, ಒಂದಾನ ಬೆಂದುವಕೂ ಕೊಡ್‌ತಿತ್, ಒಂದಾನ ತಾನೂ ಎಡ್‌ತವ. ವಕ್ಕ ಪಂದಿರ ಮಂಡೆ ಕುಳಿಕಾರ ಎಡ್‌ತವ.

ಒಂದನೆ ಪದ್ಧತಿರ ಕಡೇಲ್ ಅಕ್ಕಿ ಇಟ್ಟಿತ್ ಕಾರಣನ ತುದಿಚನ್ನಕೆ ತುದಿಚಿತ್ ಕೈಮಡತಾಂಜಿ ಎಲ್ಲಾ ಬಂದ ಅಯಿಂಗಳ ಮಿಂಞಕ್ ಕೂಟಿತ್ ದಂಡ್ ಗೆಚ್ಚ ತಂಡ್‌ನ ದಂಡ್ ಕೈಯಿಲ್ ಪುಡ್‌ಚಂಡ್ ಬಲ್ಯಮನೆಕ್ ಪೋಯಿತ್ ನೆಲ್ಲಕ್ಕಿರ ಅಡಿಲ್ ಗೋಡೆಕ್ ತಾಕಿತ್ ಬೆಪ್ಪಂಜಿ ಕಾರಣಂಗ್ ಬೆಚ್ಚ ಮೀದಿ ಕಳ್ಳನ ಎಡ್‌ತಿತ್ 3 (ಮೂಂದ್) ಪೆರಿಯವು ಕುಡಿಪ. ಅಕ್ಕಣೆಕ್ ಬಲ್ಯ ಮನೆಲ್ ಉಳ್ಳ ಅಯಿಂಗಡ ಉಂಡಿತ್ ಆಯಿತಿಪ್ಪ ಎಲ್ಲಾರೂ ಕೂಡಿತ್ ಕಾರಣಂಗ್ ಅಕ್ಕಿ ಇಡುವಂಜಿ ಪೆರಿಯಯಿಂಗಡ ಕಾಲ್ ಪುಡ್‌ಚಿತ್ ಪಿರಿಯುವ. (ಇದ್ ಬಾಳಾಜಿ ಗ್ರಾಮ ಕೊಣಿಯಂಡ ವಕ್ಕತಾರ ಕಾರಣಂಗ್ ಕೊಡಪ ಮಾಹಿತಿ: ಕೊಣಿಯಂಡ ಎ. ವಿಟ್ಟ ದೇವಯ್ಯ ಪಿಂಞ ಶ್ರೀಮತಿ ರೋಹಿಣಿ ದೇವಯ್ಯ)

ಅಂಜನೆ ಪದ್ಧತಿ : ಕಾರಣಂಗೂ ಕಾರಣಿಚ್ಛಕೂ ಜೊತೆಲ್ ಕೊಡುಪ.

ಬಲ್ಯಮಂಡೂರು ಗ್ರಾಮತರ ಮಾಚಿಮಾಡ ವಕ್ಕತ್‌ಲ್ 3 ಕೈಮಡ ಉಂಡ್. ಒಂದ್ ಪೆರಿಯ ಕಾರಣ, ದಂಡನೆ ಕಾರಣ ಇಂಞೊಂದ್ ಕಾರಣಿಚ್ಛ. ಇಲ್ಲಿ ದಂಡ್ ಭಾಗ. ಒರ್ ಭಾಗಕಾರ ಕರಣಿಚ್ಛಿರ ಆಯಿತಿಪ್ಪ. ಅಯಿಂಗ್ ಮಾಮೂಲ್ ಪದ್ಧತಿ ಪ್ರಕಾರ ಪಂದಿನ ಮಿಂಞ ಅರ್‌ಪ. ಅಲ್ಲಿಂಜಿ ಒಂದನೆ ಕಾರಣಂಗ್ ಪಂದಿ ಅರ್‌ಪ. ಅದ್‌ನ ಕೈಮಡತ್‌ಲ್ ಎಡೆ ಬೆಪ್ಪಂಜಿ ತಿಂದ್ ಕುಡ್‌ಚಿ ಪಿರಿಯುವ.

ದಂಡನೆತರ : ನಲ್ಲೂರ್ ಗ್ರಾಮತ್ ಪುಚ್ಚಿಮಾಡ ಕಾರಣಿಚ್ಛಕ್, ಕೊಡಿಲ್ ಕಾಟ್‌ನ ಪ್ರಕಾರ ಕಾರಣಿಚ್ಛಕೂ ಕಾರಣಂಗೂ ಕೊಡ್‌ಪ. ಕಾರಣಿಚ್ಛಕ್ ಚೆಪ್ಪುಡಿರ ವಕ್ಕತ್‌ರ ಕುಳಿಕಾರ ಬಂದಿತ್ ಕುಳಿಕ್ ನಿಂದಿತ್ ಅಡಿಗೆ ಮಾಡಂಡು.

ಪುಚ್ಚಿಮಾಡ ಒಕ್ಕಕಾರ ಪೂರ್ತಿ ಆಯಿತ್ ಮತ್, ಮುಕ್ಕಾಟಿರವು ಕೆತ್ತಿ ಕೊಂದುರುವ. ತಾಮನೆಕ್ ಪೋನ (ಚೆಪ್ಪುಡಿರ) ಪೊಣ್ಣಾಳ ಒಬ್ಬಳೇ ಬಾಕಿ ಆಪ. ಅವಳ ಪುಚ್ಚಿಮಾಡ ಅಲ್ಲಿಕ್ ವಾಪಾಸ್ ಕೂಟಿಯಂಡ್ ಬಂದಿತ್ ಒಕ್ಕಪರಜೆ ಮಾಡಿತ್ ಪೆತ್ತಮಕ್ಕ ಪುಚ್ಚಿಮಾಡ ವಕ್ಕ ಸಂತಾನ ಆಚಿ. ಚೆಪ್ಪುಡಿರ ತಾಯಿ ಪುಚ್ಚಿಮಾಡ ಅಲ್ಲಿಕ್ ಬಾಕೆ ಬಂದಾನಗುಂಡ್ ಚೆಪ್ಪುಡಿರ ವಕ್ಕಕಾರಳೇ ಪೂರ್ತಿ ಜವಾಬ್ದಾರಿ ಎಡೆತಂಡ್ ಇಂಚಾಂಗ್ ಈ ಕಾರಣಿಚ್ಛಕ್ ತಾಮನೆಕಾರಳೇ ಕುಳಿಕಾರ ಆಂಡು. ಕಾರಣಂಗೂ ಕಾರಣಿಚ್ಛಕೂ ಬೋರೆ ಬೋರೆ ಕೈಮಡ ಉಂಡ್.

ಕಾರಣಿಚ್ಛಕ್ ಮಾತ್ರ ಕೊಡ್‌ಪದ್ :

ಮದ್ರಿರ ವಕ್ಕತ್‌ಲ್ ಬಲ್ಯ ಮನೆಲ್ ಕನ್ನಿಕೋಂಬರೆಲ್ ಕೋಳಿ ನೆರ್‌ಚಿತ್ ಕುಳಿಕಾರ ಅಡಿಗೆ ಮಾಡಿತ್ ಎಡೆ, ಮೀದಿ ಬೆಚ್ಚಿತ್ ಅಲ್ಲಿಯೇ ಮೇಂಗಿತ್ ಉಂಡ್ ಪಿರಿಯುವ.

(ಮಾಹಿತಿ : ಮದ್ರಿರ ಕಾರ್ಯಪ್ಪ)

ಆರನೇ ಪದ್ಧತಿ :


ಕಾರಣಂಗೂ ಕಾರಣಿಚ್ಚಿಕೂ ಜೊತೇಲ್ ಕೊಡ್ಪ :

ಕೊಣಿಯಂಡ ಒಕ್ಕತ್ ಕಾರಣಂಗ್ ಕೊಡ್ತನ್ನೆಕೆ ಕೊಡುಪಂಜಿ, ಬಲ್ಯಮನೆಕ್ ಮೀದಿ, ಚೂಡುಂಗರೆ ಕೈಮಡತ್ ಕಾರಣಂಗ್ ಎರಚಿ ಕರಿ (ಪಂದಿಕೋಳಿ) ಕೂಳ್ ಎಡೆ. ಕಾರಣಿಚ್ಚಿ ಅಮ್ಮ ಕೊಡವತಿ ಆನಾನಗುಂಡ್ ತರಕಾರಿ ಕರಿ, ಕೂಳ್, ಬಾಳೆಪಣ್ಣ್ನ ಎಡೆ ಇಟ್ಟಿತ್ ಕೈಮಡತ್ ಕಾರಣಿಚ್ಚಿರ ಕೋಂಬರೆರ ಒಳ್ಲ್ ಬೆಪ್ಪಂಜಿ ಪಡಿತಾತಿಯವ.

ವಿಶೇಷ : ಕೈಮಡತ್ ಕಾರಣಂಗ್ ಪಿಂಞ ಕಾರಣಿಚ್ಚಿಕ್ ಪ್ರತ್ಯೇಕ ಕೋಂಬರೆ.

ತಾಮನೆ ಮೂಡಿಯ ಬಾಕೆ ಬಂದವೂ, ಬೆಂದು ಎಲ್ಲಾರೂ ಪೋಕಲು. ಬಿಸುಕ್ ಕಾರಣ ಕೊಡುಪ. ಕೂಟಾಳ್ಕ್ ಎದಿಕೆ "ತತ್ತಿಲ್ ಒರ್ ಎಡೆ.

- ಹಳ್ಳಿಗಟ್ಟು ಮೂಕಳೆರ ಒಕ್ಕ



ಮೂಕಳೆರ ಕೈಮಡ

ಏಳನೇ ಪದ್ಧತಿ :

ಪಂದಿ, ಕೋಳಿ ಇಲ್ಲತೆ ಹೆಸರ್ ಪಾಯಸ, ತರಕಾರಿ, ಕರಿ, ಕೂಳ, ಮೊದರ, ಬಾಳೆಪಣ್ಣ, ಬಾಳೆ ನುರುಕ್, ಅಡಿಕೆ ಪುಟ್.

ಪೊನ್ನಂಪೇಟೆ ನಾಡ್ ಚಿಕ್ಕಮಂಡೂರು ಗ್ರಾಮತ್ ಅಜ್ಜಿ ಕುಟ್ಟಿರ ಅಚ್ಚುನಾಯಕ ಬಲ್ಯ ಶಿವಭಕ್ತ. ಅವಂಡ ಕೋಂಬರೆಲ್ ಶಿವಲಿಂಗ ಇಂಜತ್. ಅದ್ನ ಇಕ್ಕಾಯಿತ್ ಬಲ್ಯಮನೆರ ಕನ್ನಿ ಕೋಂಬರೆರ ಬಯ್ಯತ ಬರಿ ಪೊರ್ಮೆ ಕಲ್ಲ ಕಕ್ಕಟ್ ಒಳ್ ಲ್ ಸ್ಲಾಪನೆ ಮಾಡಿತ್, ಅಲ್ಲಿಂಜಿ ಬೇಲ್ ಕರೆಲ್ ಚಿಟ್ಟಿಯಪ್ಪನಾಯಕನ ದಫನ್ ಮಾಡ್ನ ಜಾಗತ್ ನಾಲ್ ಕನ್ನಿ ಕಂಬತ್ ಕೊಡಿಲ್ ಪೊರೆ ಆಯಿತ್ ದಂಡ್ ಅಡಿ ಎತ್ತರತ್ ಲ್ ಐಮರ ಆಯಿತುಂಡ್. ದಂಡ್ ಅಡಿ ಎತ್ತರ, ದಂಡ್ ಮೂಂದ್ ಅಡಿರ ಅಗಲತ್ ಅಂದಾಜ್ ಏಳ್ (7) ಅಡಿ ಉದ್ದತ್ ಬೂಡ ಉಂಡ್. ಅದ್ಂಡ ಎದಿಕೆ ಅಚ್ಚುನಾಯಕ ಕೆಟ್ವಚಿಟ್ಟಿ ಕಲ್ಲರ ಕೈಮಡ ಉಂಡ್. ಅದ್ಂಡ ಒಳ್ ಲ್ ಅಚ್ಚುನಾಯಕಂಡ ಪಿಂಞ ಪಿರಿಯಪಟ್ಟಣತ್ ನಂಜುಂಡ ಅರಸಂಡ ಕೂಟಿತ್ ದಂಡ್ ಕಲ್ಲರ ಪ್ರತಿಮೆ ಉಂಡ್. ಇದ್ಂಗ್ ದಂಡ್ ಪೊಣ್ಣಾಳುವ ಬಾಕೆ ಬಂದವು ತರಕಾರಿ ಅಡಿಗ್, ಹೆಸರ್ ಪಾಯಸ, ಅಡಿಕೆ ಪುಟ್, ಬಾಳೆ ನುರುಕ್ ಮಾಡುವದುಂಡ್. ಇದ್ಂಡ ಪಡಿಕ್ ನೇರೆ ವೋಂವ ಕೈಮಡ ಉಂಡ್.

ವಿಶೇಷ : ಅಚ್ಚುನಾಯಕಂಗ್ ಕುಂಬಾರ್ ಲ್ ಚೊವ್ವಾಚೆ ಅಥವಾ ಬೊಳ್ಳಿಯಾಚೆ ಕೈಮಡ ಕೊಡ್ಕಂಡು.

ಎಂಟನೇ ಪದ್ಧತಿ :

ಬೊರಿ ತರಕಾರಿ, ಮೊದರತ್ ಬಲ್ಯ ಮನೆಲೇ ಅಡಿಗ್ ಮಾಡಿತ್ ಎಡೆ, ಮೀದಿ:

ಹುದೂರು ಗ್ರಾಮತ್ ಅಚ್ಚಿಯಂಡ ಒಕ್ಕಕಾರ ತರಕಾರಿ ಕರಿ, ಕೂಳ್, ಹೋಳಿಗೆ ತರಾವರಿ ಮೊದ್ ತಿಂಡಿ ಮಾಡಿತ್, ಉಪ್ಪು ಇಡತ ಪಾಯಸ ಮಾಡಿತ್ ನೆಲ್ಲಕ್ಕಿರ ಅಡಿಲ್ ಮಾಮೂಲಿ ಎಡೆ ಬೆಚ್ಚಿತ್ ಅದತ್ಲ್ ಮೂಂದ್ ಎಡೆನ ಕೈಮಡಕ್ ಬೆಚ್ಚಿತ್, ಒರ್ ಎಡೆನ ಬಲ್ಯ ಮನೆರ ತೆತ್ತಿಲ್ ಮೂಪಂಗ್ ಬೆಪ್ಪು. ಕುಳಿಕ್ ಆಣ್ ಆಳುವ ಅಡಿಗ್ ಮಾಡುವ. ಕುಳಿಕರ್ತಿಯ ಬಲ್ಯದ್ ಆಯಿತಿಪ್ಪಕ್ಕಾಗ. ಕುಳಿನಿಂದ ಪೊಣ್ಣಾಳ್ ಕುಳಿಕರ್ತ ಆಕಲು.

ಮತ್ತೂರ್ಲ್ ಪುತ್ತಾಮನೆಕಾರಕ್ ಕಾರಣ ಕೊಡ್ಪದ್ ಇಲ್ಲೆ.

ಒಯಿಂಬದನೇ ಪದ್ಧತಿ:

ಕೊಟ್ಟಿಗೆರಿ ಗ್ರಾಮ ಮಾಚಂಗಡ ಒಕ್ಕಕ್ ಮೂಂದ್ ಕೈಮಡ ಉಂಡ್. ಮಾಚಂಗಡ ಚಿಟ್ಟಿಯಪ್ಪ ನಾಯಕ, ಧರ್ಮಪತ್ನಿ ಅಚ್ಚವ್ವ ಇಯಂಗಡ ಕೈಮಡ ಉಂಡ್.

ಕಿಗ್ಗಟ್ವ ನಾಡ್ಲ್ ನಾಲ್ ಪ್ರಭಲ ನಾಯಕಂಗ ಇಂಜತ್. 1. ಮಾಚಂಗಡ ಚಿಟ್ಟಿಯಪ್ಪ ನಾಯಕ 2. ಮತ್ತೂರ್ಲ್ ಮತ್ತ್ ಮುಕ್ಕಾಟಿ ನಾಯಕ 3. ಚಿಕ್ಕಮಂಡೂರ್ಲ್ ಅಜ್ಜಿ ಕುಟ್ಟೀರ ಚಿಟ್ಟಿಯಪ್ಪ ನಾಯಕ 4. ಶ್ರೀಮಂಗಲ ನಾಡ್ಲ್ ಕೈಬಿಲಿರ ನಾಯಕ.

ಮಾಚಂಗಡ ಚಿಟ್ಟಿಯಪ್ಪ ನಾಯಕಂಡ ಪೊಣ್ಣ್ ಅಚ್ಚವ್ವ ಅಜ್ಜಿ ಕುಟ್ಟೀರ ಚಿಟ್ಟಿಯಪ್ಪ ನಾಯಕಂಡ ತಂಗೆ.

ಮತ್ತ್ ಮುಕ್ಕಾಟಿನಾಯಕನೂ ಮಾಚಂಗಡ ಚಿಟ್ಟಿಯಪ್ಪನಾಯಕನೂ ಬಲ್ಯ ಸ್ನೇಹಿತಂಗ. ಒರ್ ದಿನ ಮತ್ತ್ ನಾಯಕ ಮಾಚಂಗಡ ನಾಯಕಂಡ ಕೈಲ್ ಭಾಷೆ ಎಡ್ತವ. ಅಲ್ಲಿಂಜಿ ಸ್ನೇಹಿತಂಗ್ ಭಾಷೆ ಕೊಡುತ್ತಿತ್ತಾನದು, ಸ್ವತಃ ಪೊಣ್ಣ್ ತಾಮನೆಕ್ ಪೊಣ್ಣ್ ಇಪ್ಪಕಲೆ ಪಡೆ ಪೊರುವಂಡು ಎಣ್ಣೆಯಂಡ್ ಬೇಜಾರತ್ ಚನ್ನದಿನ ಇಪ್ಪ. ಅಲ್ಲಿಂಜಿ ಒರ್ ದಿನ ಮುಕ್ಕಾಟಿ

ನಾಯಕಂಡ ಕೂಡೆ ಚಿಕ್ಕಮಂಡೂರು ಅಜ್ಜಿ ಕುಟ್ಟಿರ ಮನೆಕ್ ಬಯಿಟ್ ಪೋಯಿತ್ ತಿತ್ತ್ ಬೆಚ್ಚಿರುವ. ಅಲ್ಲಿ ಒರೇ ಒರ್ ತೊಟ್ಟ್ ಕುಂಞಿನ ಪಣಿಕರ್ತಿ ಪೊಣ್ಣಾಳ್ ಎಡ್ತ ಪೋನ ಕುಂಞಿ ಮಾತ್ರ ಬಾಕಿ ಆಚಿ. ಆ ತೊಟ್ಟ್ ಕುಂಞಿಯೇ ಅಚ್ಚುನಾಯಕ.

ಪಡಲ್ ಮಾಚಂಗಡ ನಾಯಕ ಚತ್ ಪೋಪ. ಚಿಟ್ಟಿಯಪ್ಪ ನಾಯಕನ ಚುಡುವಕ ಚಾವು ಪದ್ಧತಿ ಮಾಡಿಯಂಡ್ ಇಂಜ ಅಚ್ಚವ್ವ ಅಪ್ಪರ ಬಾಕೆ ಮನೆಯೂ ಅಲ್ಲ, ಇಪ್ಪರ ತಾಮನೆಯೂ ಅಲ್ಲ ಎಣ್ಣೆಯಂಡ್ ಗೇನ ಮಾಡಿತ್ ಮಾರಗೂಡ್ನ ತಿತ್ತ್ ಪಾರಿತ್ ಅಲ್ಲಿಯೇ ಶಿವಪಾದಕ್ ಐಕ್ಯ ಆಚಿ.

ಚತ್ತಪಿಂಞ ಕೊಡವ ಪದ್ಧತಿ ಪ್ರಕಾರ ತೀಕೆ ಎಡ್ತಿತ್ ಕಾಕೆಕ್ ಬೆಪ್ಪಲ್ಲಿ ಗರುಡ ಬಂದಿತ್ ಕಾಕೆಕ್ ಬೆಚ್ಚಾನ ಎಡ್ಪ. ಇದ್ನ ಕಂಡ ಪೆರಿಯವು ಶಾಸ್ತ್ರ ಕೇಟಲ್ಲಿ ಈ ದಂಪತಿಯ ಮಹಾವಿಷ್ಣು ಭಕ್ತಂಗಾಂದ್ ತಿರಿಂಜಿ ಬಂದಂಡುಂಡ್. ಇಯಂಗಕ್ ಪಟ್ಟಂಗಡ ಕೈಯಿಲ್ ಹೆಸರ್ ಪಾಯಸ ಪಂಚಾಮೃತ ನೈವೇದ್ಯ ಮಾಡಿತ್ ಪಟ್ಟನೇ ಬೆಪ್ಪ. ಕೂಳ್, ಕರಿ ಸಹ ಮಾಡಿತ್ ಬಾಳೆಲೆಲ್ ಬೆಚ್ಚಿತ್ ಕೂಟ್ಕಾರಂಗ ಕೈಮಡತ್ ಬರಿಲ್ ಬೆಪ್ಪ.

ಈ ಕೈಮಡತ್ ಕಷ್ಟ ಸುಖಿಕ್ ಮಕ್ಕಡ ಮಂಗಲಕ್ ಪರಿಕೆ ಮಾಡಿಯಂಡ್ ಧಾರೆ ಕಯಿಪ.

ಪತ್ತನೇ ಪದ್ಧತಿ :

ಚಂಗ್ರಾದಿ ಪುತ್ತರಿಕ್ ಒರ್ ದಿನ ಮುಪ್ಪಡೆ ಎಲ್ಲಾ ಮಕ್ಕಡ ಮಂಗಲಕ್ ಪಂದಿ ಅರ್ತಿತ್ ಕಾರಣಿಂಗ್ ಕೊಡುಪ.

ಕಂಚಿತಂಡ ಒಕ್ಕತ್ ಕಾವೇರಿ ಸಂಕ್ರಮಣ (ಚಂಗ್ರಾದಿ) ಪುತ್ತರಿಕ್ ಒರ್ ದಿನ ಮುಪ್ಪಡೆ (ಕೋಳಿ) ಮಾಮೂಲಿ ಪದ್ಧತಿ ಪ್ರಕಾರ ಕೈಮಡಕ್ ಪೊರಮೆ ಪಂದಿ ಅರ್ತಿತ್ ಚುಡುಂಗರೆಯೂ, ಎಡೆಯೂ ಇಟ್ಟಿತ್ ಕೊಡ್ಪ. ಇದೇ

ತರ ಎಲ್ಲಾ ಮಕ್ಕಳ ಮಂಗಲಕ್ಕೂ ಮಾಡುವ.

ಮಾನಿಲ್ ಉಳ್ಳವು ಕಾರಣಂಗೆ ಕೊಡುಪ :

ಒರಾಂದ್ ಜಾಗತ್ ಕೈಮಡ ದೂರ ಇಂಜಿತ್ ಮಾನಿಲ್ ಉಳ್ಳವು ಅಯಿಂಗಡ ಮಕ್ಕಳ ಮಂಗಲಕ್ ಮನೆರ ಪಕ್ಕ ಪಾಮರತ್ತರ ಅಡಿಲ್ ಪಂದಿ ಆರ್ತಿತ್ ಊರ್ ಕೂಡುವೊಂದ್ ಕಾರಣನ ನೆನತಿತ್ ಮಾಮೂಲ್ ಪದ್ಧತಿ ಪ್ರಕಾರ ಕಾರಣಂಗೆ ಕೊಡುಪ.

(ಚೆರಿಯಪಂಡ ಒಕ್ಕ ಮಾನಿಕೊಪ್ಪ)

ಸಾಮಾನ್ಯವಾಯಿತ್ ದಂಡ್ ಕೈಮಡ ಉಳ್ಳಲ್ಲಿ ಕಾರಣಂಗೆ ಕೊಡುಪ ಪದ್ಧತಿ:

ಮಾಚಂಗಡ ಒಕ್ಕತ್ ಮೂಂದ್ ಕೈಮಡ ಇಂಜಿತ್, ಒಂದ್ ಪೊಳೆಕೆರಲ್ ಜಾಗೀರ್ ಭೂಮಿರ ಪಕ್ಕ ಉಳ್ಳದ್ ಆದ್ಯ ಕೈಮಡ. ಈ ಕೈಮಡ ಕಲ್ ಕಕ್ಕಟ್ ಆಯಿತ್ ಮಧ್ಯತ್ ಬೂಡ ಆಯಿತ್ ಉಂಡ್. ದಂಡನೆ ಕೈಮಡಕ್ ನಾಲ್ ಬಲ್ಯ ಬೂಡವೂ ಒರ್ ಚೆರಿಯ ಬೂಡ ಆಯಿತ್ ಪೊರೆರ ಒಳ್ಳಲ್ ಉಂಡ್. ಇಲ್ಲಿ ಆಮಕ್ಕಳ ಮಂಗಲ ಉಂಡೇಂಗಿ ದಂಡ್ ಕೈಮಡಕ್ ಕೊಡ್ಪ. ಆಮಕ್ಕಳ ಮಂಗಲ ಇಲ್ಲತ ಪೋಚೆಂಗಿ ಆಕಾಲ ವಕ್ಕಕಾರ ಕೂಡಿತ್ ಬಿಸುಕ್ (ವಿಶು) ಕೈಮಡ ಕೂಡುವ. ಮೂಂದನೆ ಕೈಮಡತ್ ಧಾರೆ ಕಯಿಪ. ಇದೊಂಡ ವಿವರ ಇನ್ನನೆ:

ಕೈಮಡ ಕೂಡುವ ಕ್ರಮ :

ಆಮಕ್ಕಳ ಮಂಗಲಕ್ ಎಟ್ವ ದಿನ ಮುಪ್ಪಡೆ ದಂಡ್ ಕೈಮಡಕ್ ಉಳ್ಳ ದಂಡ್ ಕೊಲೆ ಬಾಳೆ ತೊಂಬಕೆ ಸಮೇತ ಮಂಗಲಕಾರಂಡ ಮನೇಲ್ ತೂಕುವ ಅಯಿಂಗಡ ಅಯಿಂಗಡ ಸೌಕರ್ಯ ಪ್ರಕಾರ ಊರ್ ಕೂಡುವಾಂದ್ ಇಲ್ಲತ ಪೋಚೆಂಗಿ ಒರ್ ದಿನ ಮುಪ್ಪಡೆಯೂ ಕಾರಣಂಗೆ ಕೊಡುಪ. ಮಂಗಲಕಾರಂಡ

ಮನೆಂಜಿ ದಂಡ್ ಚೆರಿಯ ಪಿಂಞ ಬಲ್ಯ ಪಚ್ಚೆಯತ್ ಪೂಚೆ ಸಾಮಾನ್ ಪೊರಿ ಬಟ್ಟಿ, ಓರಂದ್ ಕೊಲೆ ಬಾಳೆ, ಕರ್ಪೂರ, ಊದ್‌ಬತ್ತಿ, ಧೂಪ, ಕೋತಿರಿ, ಬಾಳೆಪಟ್ಟೆ, ಕೊಡಿಬಾಳೆ ಎಲೆ, ಕಳ್ಳ, ಕುರ್ದಿ, ತೆಂಗ್, ಎಣ್ಣೆ, ತಿರಿ, ಮಂಜಪೊಡಿ ಇಚ್ಚಕಾನ ದಂಡ್ ಪಚ್ಚೆಯತ್ ಒರೇ ತರ ದುಂಬ್ಚಿಡುವ. ಇಲ್ಲಿ ದಂಡ್ ಕುಳಿಕಾರಂಗ ಇಪ್ಪ. ಅನ್ನನೆ ಪಟ್ಟೆಲ್ ದಂಡ್ ಬಲ್ಯ ಚೆರಿಯ ಪಂದಿಯ ಇಪ್ಪ. ಬಲ್ಯಪಂದಿ ಆದ್ಯ ಕಾರಣಂಡ ಆದ್ಯ ಚಾಗೀರ್ ಕೈಮಡಕ್ ಪೋಪ. ಚೆರಿಯ ಪಚ್ಚೆಯ ಚೆರಿಯ ಪಂದಿ ಇಂಞಶೋರ್ 5 (ಅಂಜಿ) ಬೂಡ ಉಳ್ಳ ಕೈಮಡಕ್ ಪೋಪ.

ಆದ್ಯ ಆಯಿತ್ ಆದ್ಯ ಕೈಮಡತ್‌ರ ಎದಿಕೆ ಗಣವದಿಕ್ ಬೆಪ್ಪ. ಕೈಮಡತ್‌ರ ಎದಿಕೆ ಚಚೊಕ್ಕಾರತ್ ಆಯಿತುಳ್ಳ ಮಣ್ಣಾಕ ಕುಂಡ್‌ಲ್ ಅದಂಗ್ ಅಕ್ಕಿಪೊಡಿ, ಮಂಜಪೊಡಿರ ಅದೇ ಪ್ರಕಾರ ಚಚೊಕ್ಕಾರತ್ ದಂಡ್ ಗರೆ ಬರೆಯುವ. ಅಂಡ ಮೇಲೆ ಬಲ್ಯ ಕೊಡಿ ಬಾಳೆ ಎಲಕಣ ಬೆಚ್ಚಿತ್ 4 ಬಾಳೆ ಪಟ್ಟೆಲ್ ಚಚೊಕ್ಕಾರತ್ ಬೆಚ್ಚಿತ್ ಮೂಲೆಕ್ ಕೋತಿರಿ ಕುತ್ತಿತ್, ಒಟ್ಟಿ, ಪೊರಿ ಇಟ್ಟಿತ್, ತೆಂಗ್ ಒಡತಿತ್ ಧೂಪ ಕಾಟಿತ್ ಆರತಿ ಎಡ್‌ತಿತ್, ಪಂದಿ ಅರಾಪ. ಇಲ್ಲಿ ಪಂದಿರ ಗಟ್ಟಿ ತೊಂಬೆ, ಚೆನ್ನಂಗ್ ಎರ್ಚಿ ಎಡ್‌ತಿತ್ ಚುಟ್ಟಿತ್ ಬೂಡತ್‌ರ ಎದಿಕೆ ಚುಡುಂಗರೆ ಕುತ್ತಿತ್ ಬಾಟ್‌ನ ಬಾಳೆ ಎಲಕಣತ್‌ರ ಚಳ್ಳೆಕ್ ಕಳ್ಳ ಬೂಕಿತ್, ಎಡೆ ಬೆಪ್ಪ. ಬಾಕಿ ಚುಟ್ಟಿ ಎರಾಚಿ ತೊಂಬೆನೋ ಅಲ್ಲಿ ಕೂಡುನವು ತಿಂದ್ ಕುಡ್‌ಚಿ ಪಿರಿಯುವ.

ಒಂದನೇ ಕೈಮಡಕ್ ಪಂದಿ ಅರಾತಿತ್ ಆನದು ಕೂತ್ ಇಟ್ಟು ಪಿಂಞ ದಂಡನೆ ಕೈಡಮತ್ ಇದೇ ಪದ್ಧತಿ ಪ್ರಕಾರ ಪಂದಿ ಅರಾಪ. ಈ ಕೈಮಡಕ್ ನಾಲ್ ಬಲ್ಯ ಬೂಡ, ಒರ್ ಚೆರಿಯ ಬೂಡ. ಇದ್‌ಂಡ ಎದಿಕೆ ಅಂಜಿ ಗಣವದಿ. ಇದಂಗ್ ಅಂಜಿ ಚುಡುಂಗರೆ, ಅಂಜಿ ಎಡೆ ಪೊಣ್ಣಾಳ್. ಮೂಡಿಮಕ್ಕ ಪೋಪನ್ನಕೆ ಇಲ್ಲ.

ಬಟ್ಟೆ ಮನೆಂಜಿ ಇಳಿಂಜನಕೆ ಮಂಗಲಕ್ಕಾರಂಡ ಮನೆಲ್ ತಾಮನೆ

ಮೂಡಿಯ ಕನ್ನಿಕೋಂಬರೇಲ್ ಕೋಳಿ ನೆರಾಚಿತ್ ಅಡಿಗೇ ಮಾಡಿತ್ ಮೀದಿ ಬೆಪ್ಪ. ಇಲ್ಲಿ ದಂಡ್ ಕೈಮಡಕ್ ಪೋನಯಿಂಗ ಎಲ್ಲಾರೂ ಬಂದಿತ್ ಕೂಡಿತ್ ಉಂಡ್ ಕುಡ್ಚಿ ಪಿರಿಯುವ.

ಮಾಚಿಮಾಡ ಒಕ್ಕತ್ ಮೂಂದ್ ಕೈಮಡತ್ ಒರ್ ಕಾರಣಚ್ಚಿರ ಕೈಮಡ, ಒರ್ ಭಾಗಕ್ಕಾರ, ದಂಡ್ ಕಾರಣಂಗ್ ಮಾತ್ರ ಕೊಡ್ಪ. ಮಾಚಂಗಡ ವಕ್ಕತ್ ಕೊಡ್ಪ ಪದ್ಧತಿ ಪ್ರಕಾರ ಕೈಮಡಕ್ ಕೊಡ್ಪ.

ಇಲ್ಲಿ ಮಂಜ, ಅಕ್ಕಿಪೊಡಿ ಬರಿಯುಲೆ. ದಂಡ್ ಕೈಮಡತ್ ಅಡಿಗೇ ಮಾಡುವ. ಪಲಚ್ಚಿ ಮರತಾರ ಎಲೆಲ್ ಚೊಳ್ಳೆ ಮಾಡುವ ಈ ದಂಡ್ ಕೈಮಡತ್ತೆ ಉಂಡ್ ತಿಂದ್ ಪಿರಿಯುವ.

ಅಲೀರ ಒಕ್ಕತ್ (ಕೊಡವ ಮಾಪಿಳ್ಳೆ) ಕಾಟರಕೊಲ್ಲಿ, ಪೊನ್ನಂಪೇಟೆ:

ಈ ಒಕ್ಕತ್ ಪಲಚಿ ಮರತಾರ ಅಡಿಲ್ ಒರ್ ಕಲ್ಲ್. ಇದೇ ಅಯಿಂಗಡ ಕೈಮಡ. ಸುಮಾರ್ 30 ಕಾಲಕ್ ಬಯ್ಯ ಇಲ್ಲಿ ಕಾರಣಂಗ್ ಕೊಡ್ತಂಡ್ ಇಂಜತ್. ಇಕ್ಕ ಇಲ್ಲಿ ಕಾರಣಂಗ್ ಕೊಡ್ಪದಿಲ್ಲೆ. ಇಕ್ಕ ಕಾಡ್ ಕೂಡಿತ್. ಇದ್‌ಂಗ್ ಕೊಡವ ಪದ್ಧತಿ ಪ್ರಕಾರವೇ ಕೊಡ್ಪ. ಕೋಳಿರ ಬಾಯಿಕ್ ನೀರ್ ಕೊಡ್ತಿತ್ ಪಶ್ಚಿಮ ದಿಕ್ಕಕ್ ತಟ್ಟ ತಡೆ ಮಾಡಿತ್ ಕೋಳಿ ಅರತಿತ್ ವಿಶೇಷ ಎಣ್ಣೆಚೇಂಗಿ ಎಡೆಕ್ ಕೂವಲೆ ಪುಟ್ಪ.

ಕೊಡವ ಕಾರಣ ಕೊಡ್ಪ ಪದ್ಧತಿ ಕೈಮಡತಾರ ವಿನ್ಯಾಸ ಇಂಞಿ ತೆರೆ ಇಕ್ಕು. ಕೇಟ್ ಅರಂಜ ಪ್ರಕಾರ ಇಚ್ಚಕ್ ತರ ಪದ್ಧತಿ ಗೊತ್ತಾಯಿತ್. ಇಂಞಿಶೋರ್ ತರ ಪದ್ಧತಿ ಉಂಡೇಂಗಿ ಮಿಂಞಕ್ ಪ್ರಚಾರ ಪಡತ್‌ವಕ್ ಪ್ರಯತ್ನ ಪಡನ.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮಡಿಕೇರಿ



ಸಮಿತಿ ಸದಸ್ಯಂಗ

ಅಧ್ಯಕ್ಷ :

ಐಮುಡಿಯಂಡ ರಾಣಿ ಮಾಚಯ್ಯ

ರಿಚೆಸ್ಪಾರ್ :

ವಿನೋದ್ ಚಂದ್ರ

ಸದಸ್ಯಂಗ :

ಚಿಲ್ಲ ಜಮ್ಮನ ನಾಣಮ್ಮಯ್ಯ ಸೋಮೇಶ್

ಬಾಚರಣಿಯಂಡ ರಾಣು ಅಪ್ಪಣ್ಣ

ಕೊರಕುಟ್ಟಿರ ಸರ ಚಂಗಪ್ಪ

ಕಾಳಚಂಡ ಎ. ಪಳಂಗಪ್ಪ

ಪೊನ್ನೀರ ಪ್ರಭು ಕಾವೇರಪ್ಪ

ಮಂಡೇಪಂಡ ಗೀತಾ ಮಂದಣ್ಣ

ವದಪಡ ಅಯ್ಯಪ್ಪ

ಮಡಿಯಂಡ ವಿಠಲ್ ಬೆಳ್ಳಪ್ಪ

ಪಡಿಂಗಳಾರಂಡ ಎ. ಪ್ರಭುಕುಮಾರ್

ತೇಲಪಂಡ ಕವನ್ ಕಾರ್ಯಪ್ಪ

ಮಡಿಯಂಡ ಸಬಿತಾ ಕಾರ್ಯಪ್ಪ

ಬೀನಂಡ ಎಸ್. ಪೂಣಚ್ಚ

ಎಳ್ತಕಾರಂಡ ಪರಿಚಯ



ಚಿರಿಯಪಂಡ ಯಂ. ರಾಜಾ ನಂಜಪ್ಪ

ಬಾಳಾಜಿ ಗ್ರಾಮತ್ ರ ಚಿರಿಯಪಂಡ ಮುತ್ತಣ್ಣ ಪಿಂಞ ಕಾಮವ್ವ
(ತಾಮನೆ : ಮುಕ್ಕಾಟಿರ) ದಂಪತಿಯಡ ದಂಡನೆ ಮೋಂವೊ ರಾಜಾ
ನಂಜಪ್ಪ D.M.E. ಮಾಡಿತ್ S.J.P. ಲ್ ಅಪಿಸ್ಪಿಂಟ್ ಲೆಕ್ಟರರ್
ಆಯಿತ್ ಚಾಕ್ರಿ ಮಾಡಿತ್. ಪೊನ್ನಂಪೇಟೆ ಕೊಡವ ಸಮಾಜತ್ ರ
ಮಾಜಿ ಅಧ್ಯಕ್ಷ ಪಿಂಞ ಖಜಾಂಚಿ, ಗೋಣಕೊಪ್ಪ ಕೊಡವ
ಸಮಾಜತ್ ರ ಮಾಜಿ ನಿರ್ದೇಶಕ, ವಿರಾಜಪೇಟೆ ತೇನ್ ಸೊಸೈಟಿರ
ಮಾಜಿ ಅಧ್ಯಕ್ಷ, ಜವಾಹರ ನವೋದಯ ವಿದ್ಯಾಲಯತ್ ರ
ಅಧ್ಯಕ್ಷ, ಇನ್ನನೆ ಪಲತರ ಸಂಘ ಸಂಸ್ಥೆಲ್ ನೈಚಿತ್. ಕರ್ನಾಟಕ
ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷನಾಯಿತೂ ಕಾರ್ಬಾರ್
ಮಾಡಿತ್.

ಇಯಂಗಡ ಪೊಣ್ಣ್ ಜ್ಯೋತಿ (ತಾಮನೆ : ಚೌರೀರ), ಮೋಂವೊ
ಬೋಪಣ್ಣ, ಮೋವ ಅಮೂಲ್ಯ. ಇಯಂಗ ಇಕ್ಕ ಪೊನ್ನಂಪೇಟಿರ
ಮತ್ತೂರು ಗ್ರಾಮತ್ ವಾಸ ಉಂಡ್.

ಇಯಂಗಡ ವಿಳಾಸ :

ಚಿರಿಯಪಂಡ ರಾಜಾ ನಂಜಪ್ಪ
ಮತ್ತೂರ್ ಗ್ರಾಮ ಪಿಂಞ ಪೋಸ್ಟ್
ಪೊನ್ನಂಪೇಟೆ
ಮೊ. 9448433227